

RE LOKETSE HO PHETA

Ho LOKELANG HOHLE

 Kamehla ke monyetla ho tla tlung ea Morena. Ha ke eso khone, bophelong ba ka, ha ke e-so ikoahlaele ho tla tlung ea Hae. Ke e... Empa ke kholoa hoseng hona e batla e le nako e boima ho fetisa eo nkileng ka tla ka eona. E, ke hantle. Ka hona, lintho lia etsahala bophelong, rea tseba, tseo re tlamehang ho tobana le tsona. 'Me re tšoanelia ho hopola seo, hore e fihlela bohle.

² 'Me re leboha haholo hoseng hona, 'na, 'me kea tseba baena le likhaiseli tsa ka ba leboha Molimo haholo, ho tseba hoba 'mè oa rōna o bolokehile.

³ 'Me o tsofetse, 'me esale re se lebeletse nakoana, hobane ke 'mè oa ba bangata, 'me o pshatlide bophelo ba hae. Mehleng ea 'mè oa ka, ba hlokile lintho tsa joale, ho hlokomela bommè ha ba fumane masea a bona. Mohlomong, ho ka thoe, mama o ne a fumana ngoana e mong hoseng hoo, 'me a eme ho hlatsoa liaparo thapama eo. 'Me joale ba robala kokelong matsatsi a 'maloa, ka meriana ea mefuta eohle, e leng teng. Re leboha lintho tse joalo tse ka thusang bana, bommè bana le bohle.

⁴ O haufi, haufi haholo le lefu joale. 'Me ke... [Moena Branham o a lla—Mohl.] Ke feela e—feela ho batla ho le boima hoseng hona, empa ke—ke tšepisitse ho ba mona. 'Me ke... .

⁵ Joale, nke ke ka re 'mè o a tsamaea. Ke buile khafetsa. 'Me lipaki li ngata, ka lipono. Ke itse, "Hola 'mè a robetse, a eshoa, ebe o ncheba sefahlehong o re, 'Billy, ho tla—ho tla etsahala'ng ka 'na?'" Ke itse, "Ntle leha Molimo a ka mpolella, nke ke ka tseba. Nke—nke ka bolela." 'Me ke sona se hlahileng. Haeba 'mè a tsamaea, ruri O mpatetse eona.

Pele ntate a eshoa, ke bone pono ea ho tsamaea ha hae.

⁶ Eare ke sa le moetsalibe, ke bone moena oa ka, oa pele, o ne a tsamaea.

⁷ Howard. Ke le boleletse bohle, lilemo tse peli kapa tse tharō pele a tsamaea, mabapi le ho tsamaea ha hae.

⁸ Empa, 'mè, ha A e-so mpolelle lentsoe. 'Me haeba a tsamaea, ke ntho eo ke sa e tsebeng. Le koana, re fumane... Ngaka e itse ha e bone kamoo a a fetileng Sontaha se fetileng a ntse a phela. 'Me o hlide o sithabetse. Empa, leha ho le joalo, eitse ha ke... .

⁹ E ka ba khoeli, joaloka ha ke entse ho Mof. Broy; ke rata ho hloela batho, haeba ke ba tseba ba atametse qetello, ho bona kamoo ba emeng kateng. Re tšoanetse ho kholiseha ka sena. Ha

re batle feela ho re, “Be, e ka ba, ho lokile.” Re batla ho kholiseha hore e lokile.

¹⁰ Ke qoqile halelele le ’mè hoseng ho hong. O itse, “Billy, ke—ke phetse halelele kamoo nka khonang.” O itse, “Ha ho seo nka hlolang ke se phelela.” O itse, “Ke tlameha ho tsamaea.” Le ho re, “Nka mpa ka ikela, ho ba ’moho le ntate le bana ba bang Koana. Ke le bona kaofela, khafetsa.”

¹¹ ’Me eare ha a kenngoa amalanseng, ho isoa kokelong, ho fuoa glucose, a sa khone ho ja letho. Ba tlameha ho mo jesa glucose ka methapo ea hae. ’Me ke itse ho èena, ha re mo kenya amalanseng, Ka re, “Joale, mama, tsohle li lokile.”

A re, “Ke hlolohetse ho tsamaea.”

¹² ’Me ka re, “Mama, holane u ntšiela letlotlo lefatšeng, la milione tse lekholo tsa didolara, tsa rōna bana, kapa u re siela lelapa le qalang motseng ho ea motseng, le k eke la bapisoa le bopaki boo u re sielang bona, ‘Ke itokiselitse ho tsamaea.’” Ke letlotlo le ke keng la rekova ka chelete, ho tseba hoo.

¹³ Ka baka leo, har’ a tseo, ke ema ka sebete, ke lumela lintho tsen a tseo ke li rerileng. Li lokile ho ’mè oa ka, li lokile ho bommè ba batho ba bang, li lokile ho rōna bohle. Nke ke ka re, “Molimo, u se ke ua mo nka.” Hobane, kea tseba hang ha soule ea hae e shoang e siea ’mele ona, o na le o mo emetseng. ’Me e tla ba mosali e mocha hape, metsotsong e ’maloa feela hoba a falle mona.

¹⁴ Na le bone lesea ha le tsoaloa, mesifana ea lona e a thanya e a rutleha? Empa ha le fihla lefatšeng, le amohela seperete, le ntano fetoha soule e phelang. ’Me hang ha soule e khutla e tsoa ’mejaneng oo, o teng o e emetseng. Ua bona? Hobane, pele, Molimo o etsa soule le seperete, e kena mebeleng feela. ’Me, ’me ha re tloha mona, re mpa re fetola malulo re ea ho a mang. “Ekare ha tabernakele ena ea lefatše e senyeha, re na le e re emetseng.” Ka hona, ke matšeliso a rōna.

Joale ha re rapeleng.

¹⁵ Ntata rōna ea Tlotlehileng, oa Leholidō, re ne re ka etsa’ng lihoreng tse tšabehang tsen a tlhoko, hola e se ka Uena? Empa tšepo ea rōna e hahiloe holim’ a Mali a Jesu le ho loka! ’Me re thabile haholo ho tseba hoba Lefatše le leng teng mose ho noka. Mohla U qetileng ka rōna lefatšeng lena, re mpa re fetola malulo a rōna feela, ho ea Lefatšeng le khanyang leo, koana, moo maloetse le pelō tse bohloko li leng sieo, lefu kapa karohano. Re tla lula le Uena le baratuoa ba rōna ka mehla. Ka hona, re U leboha ka tšepo e khanyang ena e ahileng sefubeng sa rōna kajeno.

¹⁶ ’Me ho bonahetse, Morena, ke imeloa ho theoha hoseng hona; e seng ho U sebeletsa, empa ke tsebile ke tšohile ke ipotsa kamoo ke tla atamela Molaetsa ona oa kereke hoseng hona, oo ke utloang U o behile pelōng ea ka. Kamoo sera se

ntsokolitseng sa ba sa ntsokotsa ka eona! Empa ke tsamaile hakana, ho fihla sefaleng, ka Lebitso la Hao. 'Me ke inehela, Molaetsa le tsohle, matsohong a Hao, ho tseba hoba U khona ka ho fetisisa ho O tobisa pelōng ka 'ngoe, le ho re baballa ka sohle seo re se khonang. Re e nehela ho Uena eohle joale, le rōna 'moho, re le tšebeletso ho Uena; joaloka ha lipounama tsa ka e le molomo oa Hao, 'me litsebe ke litho tsa Hao tse mame lang. Re hlo honolofatse, Morena.

¹⁷ 'Me bommè ba bang, bontate, le bao ba tlang ho hlaha matsatsing a tlang, ha lefatše le ka ema, ba ke ba itokise 'me ba tsebe, le bona, hore tsatsi le leng ba tlameha ho theohela horeng eo 'mè a e finyeletseng. Kea rapela, Molimo, ba tle ba hlophise kajeno. Hoba ho se letho le molemo lefatšeng lena. Ha ho chelete e ka rekang, ha ho botumo bo ka baballang; ha ho letho le ka thusang ntle le Molimo, homme Molimo a inotši. 'Me re itšoarella ka letsoho la Hae le sa fetoheng, re tseba A boletse, "Maoto a ba lokileng a tsamaisoa ke Morena." Ka hona matšoenyeho a manyenyane a rōna joale, bophelong ba joale, a tla ba manyenyane haholo. Joaloka seroki ha se buile, "Maima a tsela a tla nyamela, ha re fihla qetellong ea tsela."

¹⁸ Re thuse, Morena, ho hahamalla pheo ea pitso e holimo; ho tseba hoba tsatsi le leng, mose o moholo mona, re tla kopana monateng. Hlo honolofatza Mantsoe a Hao joale. Hlo honolofatza bahlanka ba Hao. Ngoana e mong le e mong oa Molimo ka mona, lipelō tsa bona li futhumatsoe li fuluhuoe hoseng hona. 'Me, Ntate, le 'na ke hloka bohashana ba eona, ka bona. Ke U rapela ho e aba, lintho tsena tsohle, ka Lebitso la Morena Jesu Kreste. Amen.

¹⁹ Joale mona ke bone re tšoere sehlopha sa lisakatuku. 'Me kea . . . Re tla li finyella nakoaneng feela.

²⁰ Ke tsoa fihla ho boea leetong e leng leeto la ho tsoma, le monna holimo pel'a Alaska. Ua tseba, sehla sena e batla e le sehla seo ke se khethang, sehla sa selemo, ho ikaha bocha, ho itokisetsa lihla tse kapele tsa mosebetsi.

²¹ Ha ke matla haholo, be, nka re, methapong ea ka. Tsamaiso ea—ea methapo ea ka e mpe haholo. 'Me ke lemoha ho qosa tsamaiso ea mofuta oo ho opa bosebeletsi boo Morena a mphileng bona. U ke ke ua khantsetsoa tsohle, holim'a lefatše. Nameng, ke thabetse 'mele o koenneng. Feel a tsamaiso ea methapo ea ka, hobane u tsamaea hantle lipakeng tsa mola oa tlhaho le oa tse mohlolo, 'me e u tabola likotoana. 'Me ha ke e-so leke ho lula fatše ho hhalosetsa liphutheho tsa ka, hobane ba ke ke ba utloisia, hobane ha ke utlosise, ka bona. Empa esita le lingaka, tse ntlahlobang li hatella methapo hlahlobong eo; li boletse li e-so bone ntho e ka eona, ua bona, kamoo e tlohang tulong se seng ho ea ho se seng, ho fihla koana ho se seng. Ha ke utloisia patlisiso ea mahlale a bona 'me, kapa seo ba se entseng, mekhoa

eo ba etsag lintho. Empa ke tseba ntho e ntlhahetse tsatsi le leng, mohla Kreste a neng a ntšoara, ke ile ka fetoloa.

²² 'Me ke rata ho bua sena feela, mohlomong se ka 'natlafatsa. Eka re se hlolla haholo, ho se bua, hoseng hona. Empa feela, pele ke kena Molaetseng oa ka, ho ikokobetsa, ke batla ho bua ka sona. Ha ke ne ke rera ho tla koano, ha kea tseba 'mè a tla kula.

²³ 'Me ke boetse ke tsebisitse tšebeletso bosiung bona. Molimo ha o ratile, re tla etsa joalo. Ke tla fihla mona bosiung bona, ho bua, haeba ho itoketse ho molisa. [Moena Neville o re, "E, monghali!"—Mohl.] 'Me ke batla ho bua ka, *Motšelisi O Tlide*, bosiung bona. 'Me eo ke tšebeletso ea bosiung bona. 'Me re na le tšebeletso ea selallo mona bosiung bona. 'Me batho bohole ba menngoe ho tla le—le ho ja selallo sena le rōna bosiung bona, le bakeng sa Molaetsa.

²⁴ Ke sehla se fetileng ha ke nyolohetse Alaska, kapa holimo pel'a Alaska, British Columbia, ho... litšebeletsong, moo Morena a re fileng nako e tlotloang haholo. 'Me esale ke—ke ratile libaka tse kantle.

²⁵ Le nkutloa hantle ka morao? Na...ha le khona, phahamisang matsoho a lōna, motše mono.

²⁶ Haesale ke ratile libaka tse kantle. Motho mang le mang o tseba lelapa lesō, o a tseba mono. 'Mè oa ka, ea shoang kantle mono joale, 'mè oa hae e ne e le mo-India. 'Me tšokoloho ea ka ha e a e fetola, 'me ke...ho rata libaka tse kantle; 'me ke thabile, hobane ke hona moo ke bonang Molimo. Ha ke tsoe hakaalo ho tsoma tse hlaha, ke—ke ho lula le Molimo lekunutung. 'Me ke tsoma ke le mong.

²⁷ 'Me eare ke sa lutse holimo mono, ka kopana le masupatsela a mang a maholo a matle. Ke ona mathaka ao, Canada le libakeng tseo, pele u ka kena mafeelleng, balaoli ba matšolo ba u nehella lesupatsela. 'Me lesupatsela leo le tlameha ho u khomarela.

²⁸ 'Me eaba ke kopana le moena ea khabane oa Mokreste, ea mocha, oa mopentekosta, e le lesupatsela le tsejoang Canada. Mohats'ae e le mosali ea babatsehang, ea pholositsoeng. 'Me a ka ba lilemo tse mashome a mane, 'me a ena le bana ba bahlano, bashanyana ba banyenyane, ho qala ho leshome le metso e robeli ho theohela ho tse ka bang peli. 'Me a filoe lehlakore la limaele tse makholo a mahlano la Alcan Road, e le lesupatsela la sebaka sena.

²⁹ Ma-India a 'maloa a teng motše mono, a sa batlang ho tsoa, 'me ba khohlahetse haholo, ba hlomme letšoao, "Ha u ka kena mona, mali a tla tšoloha." Empa, koana, ra feta pel'a lona, ra ba ra khutla, hobane ke ne ke batlile ho buisana le ma-India ao. Holim'a tsohle, lefatše leo ke la bona pele e-ba la rōna, lea tseba. 'Me ra nyakalla le bona, Sehla se fetileng, ho ba bolella ka Morena Jesu.

³⁰ 'Me monna e mong oa leqheku, leqheku la morabe, a batla a le lekholo. A bolokile ntho ea hae... Ka bona lebaka la hae ho se batle ho tsamaea. Ba pata bafu ba bona kahar'a sekoqo, ba fanyeha sekoqo holimo sefateng. Keha ba patile masea a mabeli mono. Ehlile, keha a sa batle ho tsamaea. Ke bona lebaka la hae ho se batle ho tsamaea. 'Me bobolokelo, e—e goromente oa Canada, Bolaoli ba Canada bo itse, "Haeba ba khohlalahala, ba tla ba ntša mono ba ba tlose." Khele, ha u batle ha ba ka etsa joalo; athe maseanyana a bona a fanyehiloe lifateng mono.

³¹ 'Me ka hona, leha ho le joalo, eaba linoka li theoha li re khaola ra sitoa ho khutlela naheng eo re neng re tla tsoma bere ea grizzly. Mongh. Southwick enoa, ke eéna Southwick, e ne e le lesupatsela. 'Me o... 'Me ke tsamaea le moreri e mocha, e le Eddie Byskal. 'Me eaba moshanyana oa hae... Mongh. Southwick a e-na le e—e moena oa hae, ea batlileng, ho ba lipakeng tsa lilemo tse mashome a mabeli a metso e mehlano le tse mashome a mararō, a tšoentsoe ke sethoathoa haholo.

³² Mongh. Southwick e sa tsoa ba Mokreste, nako e batlileng ho ba selemo e fetileng. Lek'hauboi pele, 'me ba batla ba khohlahetse, u a tseba, bophelong ba bona. 'Me, empa e sa tsoa ba Mokreste, 'me o ne a lumela. 'Me o itse, "Ke balile buka ea hao, Moena Branham." 'Me a 'na a ingama-ngama, mabapi, ka moena oa hae ea tšoeroeng ke sethoathoa. A re, "Oh, hola nka tlisa moena oa ka ho uena!" Be, lea tseba u ikutloa joang, ha u na thuso, ha u khone ho etsa letho, 'me u ipotsa kamoo ntho eohle e ka etsahalang.

³³ Hape Canada, ka tloaelo banna ba... Lōna banna ba kenang maetong, lea tseba, ho laola lipere. 'Me ke rata lipere le liphooftolo. Ka tloaelo ba khoesa lehaletere, ba li kolohanye, ho kolohanya sepane. Empa mono ha u khone, majoe a teng a bohole; ha u ka lahleheloa ke pere e le 'ngoe, u ka lahleheloa ke sepane sohle. Rea li tloheloa ke hona, re li kenya tseleng ka serukhu.

³⁴ 'Na ke le ka morao, ke kaletse petsana, ke leka ho laola maferena kea khutlisa. 'Me Moea o Halalelang, ka mohau oa Hae, oa theoha. Ka hlabo pere ka liporo, ka feta mokoloko, ka fihla ho Mongh. Southwick hloohong, ka pele koana, har'a lihlahla. 'Me ka re, "Bud?"

A re, "E, Moena Branham."

Ka re, "Na u tla nka polelo ea ka?"

A re, "Ka sohle seo u se buang."

³⁵ 'Me ka re, "Ke u tšoaretse HO RIALO MORENA." Ka re, "Ea lata moena oa hao Fort Saint John," e leng bohole ba limaele tse batlileng ho ba makholo a supileng kapa a robeli, "mo tlise 'mileng mona." O lula motlotloaneng oa khale ha a na setofo 'me o ikomosa ka phootsoana e bitsoang salamander mono, o kentse bana ba hae ka mono. 'Me ka re, "Khetlo la pele

ha sethoathoa se mo tšoaroa, mo hlobolise hempe u e ntše le mokokotlong oa hae. Ke tla u laela seo u tlang ho se etsa. E lahlele mollong, u re, ‘Sena ke se etsa ka Lebitso la Jesu Kreste.’’

A re, “Ke tla etsa joalo.”

³⁶ A tloha ke hona, a lata moena oa hae, a mo tlisa holimo mono. ’Me hoseng a tlamehile ho tsoa a kena tseleng, le monna ea itseng oa paballo ea tlahao. ’Me ka tloaelo litlhasedo tseo li tea moena oa hae habeli kapa hararō, ka letsatsi, li mo futuhetse esale moshanyana. ’Me mohatsa’e a harohile letsoalo, ka baka la hae, ha li mo futuhela, a etsa moferefere; e le mohlankana, a le matla haholo.

³⁷ ’Me eaba lia mo futuhela, Bud a se a tsamaile. Sebakeng sa ho qhomela kantle ka fesetere, ka temalo ea hae, a hlèka bana tseleng, a mo hloella holimo feela, a rutla hempe ea hae; mosali e monyenyan, ea tletseng Moea o Halalelang, a rutla hempe ea hae a e lahlela mollong, ’me a re, “Sena ke se etsa ka Lebitso la Jesu Kreste.” Ha li eso mo futuhele ha esale. Mono ke sehla se fetileng.

³⁸ Hangata, kea tseba ho batla ho le boima. Ho batho ba sa utloisiseng, ho thoe, “Moena Branham, hobane’ng u ka nka leeto la ho tsoma?” Ua bona, ba mpa ba sa e utloisise. Ho leka ho e hhalosa ha ho hlokahale, ua bona. Mono u tšoara batho ba ke keng ba tšoaroa le ka mohla.

³⁹ Likhoeli tse batlileng li le peli tse fetileng, kapa ha se khale hakaalo, ka phaphama hoseng ho hong. Kea kholoa, ha kea tiea, ke e boleletse boholo ba kereke. Ba bangata mona ba nkutloile ke e phetha le pele e hlaho. ’Me ponong ka bona, ke bone phoofolo e khōlō, e tšoana le khama. ’Me e le linaka li khōlō, li phahame. ’Me e le... Ka tlameha ho likoloha ka lephakong, majoe a le bohale, ka mokhoa *ona*, ho e fihlela. ’Me e le phoofolo e tsebahalang haholo. Khau ea phoofolo e khōlō. ’Me teng ka bona monna ea apereng hempe e tala, e mebala. ’Me eaba, tseleng, hoba ke fumane phoofolo, ke ne ke utloile e—e lentsoe le itseng, “Bophahamo ba linaka tseo ke di-inchi tse mashome a mane a metso e ‘meli.’” Ke bophahamo ba batlileng ho ba *bokana*. ’Me ena e le phoofolo ea tonana. ’Me tseleng e khutlang, ka bona bere ea grizzly e le khōlō ea tonana.

⁴⁰ Joale, eo ke bere ea tsebahalang. Masika a grizzly a mane. Le leng ke silver-tip, e leng le tsebjoang. Le latelang le bitsoa, ka lebitso la batala, *kadish* (?), le na le botšo, lona le tsebe e chitjana; la bobeli. Borarōng, ke grizzly ea tloaelo, e lipakeng tsa botšo le bosootho, ke bere e khōlō. ’Me le latelang ke Kodiak, e fumanoang feela Kodiak Island le—le Alaska bophirima; e khōlō, ke moronono, e khōlōhali har’ a libere tsohle, empa ke grizzly. Empa silver-tip eona e ntšo, ’me bosoeu bo holim’ a... bolisifera bo tšasitsoe ntlheng ea boea. Eona e a tsebahala, e qhokoloa habobebe, ke bere e mabifi.

⁴¹ Ka thunya bere ka tholoana pelōng, ka e bolaea. Empa ka belaela bootloana ba sethunya seo ke se tšoereng, hore nka e khona na. 'Me ke ne ke boleletse baena. Ba bakae mona ba nkutloileng ke e pheta mona le pele e hlaha? Phahamisang matsoho a lōna. Be, ehlile, boholo ba bona, ua bona.

⁴² 'Me eaba Mongh. Arganbright u ntetsetsa a mpatla ho ea Alaska. Be, sebakeng sa ho ea Alaska, ka utloa ke susumetsoa ho khutlala holimo koana leetong lena, holimo mona 'moho le Bud, hobane ke ne ke mo tšepisitse.

⁴³ Eitse ha ke fihla holimo mono, ka bolella mohats'ae le batho bohle ba mathokong mono, lintho tsena tseo A li boletseng. Ka re, "Empa, joale, empa har'a lōna ke mang ea tšoereng hempe e tala, e mebala?" Ho se motho ea e tšoereng. "Be," ka re, "koana e tšoanetse ebe e tla etsahala leetong la ka le leng. Empa, kae-kae, Morena o tla mpha eona, hantle feela." Eaba ke re, "Ke ne ke hopotse e ka ba leetong lena."

⁴⁴ Be, ra tsoelapele, leetong. 'Me tsatsing la pele, ha re fihla holimo, holim'a meeli ea meru, mono ha ho patsi, ke holimo koana melapong ea lehloa, ka lipere tsa rōna. 'Me letsatsing labobeli, ra tsoma tse ling, 'me ra fumana linku tse ngata tsa linaka tse harelaneng likotara tse tharo, le tse joalo, empa feela e ne e sa loka.

⁴⁵ 'Me le bua ka meqoqo ea setsoalle, e mong le e mong oa rōna e le mopentekosta 'me a ena le Moea o Halalelang! Ra hla ra itaha nakong holimo mono, re shebile mebala eo ha e fetoha, le lithaba tseo, holimo koana moo Molimo a phelang a inots'i! Nako e babatsehang hakakang! Re sa robale pele ho hora ea pele mesong, re rorisa Molimo feela re nyakaletse!

⁴⁶ 'Me letsatsing la bobeli, ra tsoa. 'Me limaele tse ka bang tšeleta morao, morao holim'a melapo ea lehloa, ra bona lipheleu tse itseng tse khōlō. Le ho re, "Be, re tla khutla, 'me re tla kena tseleng hoseng ho hlahlamang ha letsatsi le chaba."

⁴⁷ Eaba re tloha hoseng ho hlahlamang, pele letsatsi le chaba; ra fihla, ka hora ea borobōng, re se re nyolohetse holimo koana moo re boneng melapo ea mahloa.

⁴⁸ Empa tseleng e nyolohang, ke ne ke bone karibou ea ka ea pele e hlaha. Ke e-so e bone pele. Ke bone tsa lehae, koana Lapland, le joalo-joalo, empa e sang karibou; ha se . . . Karibou ke lebitso la batala, ke "reindeer." 'Me ka tloaelo linaka tsa tsona li makala, ka mokhoa ona, le leng le leketlile holim'a nko ea tsona hantle, ebe moo makala a hlhang kapele; 'me linaka li tšoarana, le Makala a mang a bophara bo bokana.

Bud o ne a itse ho 'na, "Mohlomong . . ."

⁴⁹ Ka re, "Che, che. O . . ." Ka re, "E ne e se karibou, hoba linaka tsa eona li ne li se joalo." Empa hoseng hoo, ha re nyoloha,

khele, ke ne ke bone khomo le namane. Eaba re khelohela lehlakoreng le leng, 'me ka bona, pohoana e ncha, e mathang.

⁵⁰ 'Me Moena Eddie, ke morongoa ea neng a batlile ho fepa ma-India. Ke monna ea lokileng, o tsoa lelapeng le letle, mohats'ae o tsoa lapeng la maemo. 'Me liphaka tsa bona li hlalatthehile holimo *mona*, li lonngoe, ke matsetse, ba phetse le ma-India le lintho, kantle mono ba leka ho tlisa Kreste ho ma-India. Ho nka mohau ho etsa joalo! Ho phela kantle mono ka botoro ea makotomane le sirapa, le ho robala meqhemeng e nang le litšitsili, matsetse le ntho eohle, ba lonngoe ka mokhoa oo, fela, ho tlisa Evangelia ea Jesu Kreste!

Eaba Moena Eddie o potela ka leralla.

⁵¹ 'Me ka lula ke hloletsoe feela, lihora tse peli, ke shebile tlhoroo ea thabahali e roetseng lehloa. Ka nahana, "Morena Molimo, ntumelle ho phela mona Mileniamong." Ho bona li-yellow quakers tlase leralleng, le li-buckbush tse khubelu, 'me li tsoakana le litlhoroo tsa lithabahali tse roetseng lehloa, li ikhalimisa kahar'a matša. Ntho e 'ngoe e feela teng mono, u ka lula mono feela oa lla, oa lla oa ba oa lla, hoba hoo ho ka takoa ke Molimo o 'notši. Ha ho letho le ka e etsang, ua bona.

⁵² 'Me eaba ke lutse mono, ka tsoatsoa ke nahanne, "Be, ebe ho etsahetseng ka Moena Eddie?"

⁵³ Ka ea ho Bud, a lutse mono a nyakallisitsoe ke eona, le eèna, lihora tse ka bang peli. 'Me ra ema, eaba ke bona k'hamera ea movie ea Eddie e robetse mono. Qhooeng ea lithaba tseo, ha ho letho haese karibou, boriba, boriba feela, ke holim'a moo ho sa hlaheng lifate.

⁵⁴ 'Me ka 'mona tlase leralleng. A phahamisitse menoana ea hae ka tsela *ena*, a nanarela pohoana ena ea karibou. Be, a—a thunya karibou. Ra e buha feela, ra boela ra nyoloha leralla. Ka theohela tlasana ka ho lekana ho kha metsana.

⁵⁵ 'Me ke ntse ke qamaka ka ligalase. Ka mokhoa o itseng, limaele tse peli ho tloha ho 'na, keha phooefolo ea ka e robetse mono. Ke e bone. Ka re, "Ke eona. Ke eona eo." Ka re, "Sheba mona, bona majoe a bohale ana, re tlameha ho a potoloha ka lehlakoreng." 'Me ka re, "Ho setse ntho e tala feela, e mebala . . ." 'Me ka sheba, ke ha Eddie a apere hempe, e tala e mebala.

Ka re, "Eddie, ke itse u . . ."

⁵⁶ A re, "Moena Branham, Ha se 'na. Mohats'ae ka o tsoanetse a be a e suntse ka mono." A re, "Ke fumane hempe e hloekileng hoseng hona, empa ha kea tseba. Mohats'ae o tlamehile a be a e suntse ka mono." Molimo ha o hloloe le ke ntho e le 'ngoe. O phethehile feela. Ke eo, o apere hempe e mebalabala.

⁵⁷ Lesupatsela le itse, "Moena Branham, ha ke tsebe kamoo u tlang ho e finyella le ka mohla."

⁵⁸ Ka re, “Ha ke tsotelle haeba e le bohole ba limaele tse mashome a mahlano, ke e fumane!” Ka re, “Ke ea ka.” ’Me ra tloha re potoloha majoe a bohale ao, feela, oh, ke motheo o mokaalo, ho pota ka mathoko feela.

⁵⁹ ’Me ra fihla mono, ka thunya karibou e khōlō. ’Me—’me sebakeng sa linaka tse makala, e le litsenene; ha ke eso bone e joalo. Na le bona mohlolo, tsela ea Molimo ho etsa lintho?

⁶⁰ Eaba re bolella bashanyana ho theoha, ho lata lipere ho ea nka nama, le ho kopana le rōna mosikong ha re theoha. Ehlide, Moena Bud o ile a qamaka, a re, “Efēla ha pono ea Moena Branham, e nèpile pholiso ea moena oa ka ea folisitsoeng, a tšoenngoa ke sethoathoa, o tla fumana phoofolo ho sa tsotelehe moo e leng teng.” Eaba o re, “Le kopane le rōna feela, re tla e thola, ha re theohela mono.”

⁶¹ ’Me hoba re e buhe; lettlalo le linaka, le tsohle, li batla li etsa dipondo tse lekholo le mashome a mabeli a metso e mehlano; empa ke feela, ha se lettlalo la ’mele, ke lettlalo le leketlileng feela. Eaba o re, “Joale, Moena Branham,” ho re, “ke batla ho u botsa taba.” Ho re, “Ke batla ke sa khone ho e buhela mona,” ’na le eèna ‘moho, a le mong lehlakoreng ka leng. A re, “U re linaka tsee ke ‘di-inchi tse mashome a mane a metso e ’meli?”

Ka re, “E, monghali.”

A re, “E ka re li etsa mashome a robong, ho ’na.”

Ka re, “Li etsa mashome a mane a metso e ’meli.”

’Me a re, “Ke tšoere teipi e lekanyang mokotleng oa qhana ea ka.”

Ka re, “Ho lokile, u tla e bona hantle feela.”

⁶² A re, “Ka hona, ho latela seo u mpoleletseng sona, nqa e ’ngoe lipakeng tsa mona le moo re kopanang le bashemane bao, ea apereng hempe e tala, u tlil’o fumana bere e boea-putsoa ea grizzly?” Ho re, “Ha ke eso e bone, ’me ke phetse lithabeng tsena bophelo ba ka bohle.”

Ka re, “Empa ke HO RIALO MORENA.”

Ho re, “Na u tseba moo e leng teng?”

⁶³ Ka re, “Che. Empa e teng kae-kae lipakeng tsa mona le bashemane bane.” Re khona ho ba bona hantle, limaele tse ka bang tharō, tlase moeling oa moru. Ka re, “Re tla e fumana.” Joale, eo ehlile ke ntho!

⁶⁴ A re, “Ha ho le joalo, re tla fihla tlase mono nakong ea hora le halofo. ’Me u re u tlil’o fumana moronono oa bere ea grizzly, e boea-putsoa, nqa e ’ngoe lipakeng tsa mona le bashemane bane?”

Ka re, “Ke ho latela Lentsoe la Hae.”

A re, “E teng mono.”

⁶⁵ Eaba re hloesa linaka, lihloohong tsa rōna, ra hulana re theoha leralla, ra ba ra fihla melapong ea lehloa. Ha re fihla melapong ea lehloa; ho chesa haholo, ra tlameha ho kena melapong ea lehloa nakoana, ho ipholisa. Ra tšela molapo oa lehloa, ra theoha ho fihlela moo metsi a tsoang tlas'a molapo oa lehloa, le tlase ho kena . . . ra qala ra kenella moru. Ra lula fatše feela, ho phomola.

⁶⁶ Ka retoloha, ka sheba. Ka re, "Sheba, Bud! E ka re khomo, e b aba bohole ba limaele tse peli."

⁶⁷ A khoesa digalase, ho sheba, ho re, "Moena Branham, nthuse, ke boea-putsoa!" Ho re, "Sheba kamoo e phatsimang letsatsing leo!"

⁶⁸ Ka re, "Ke eona." Ka re "Be tloo re e fumane." Ka hona, ke seo re se entseng, ra tloha ra ea e fumana. Ho latela, ponong, ho se ho phirimile ho e buha, ra tlameha ho emela letsatsi le hlahlamang.

⁶⁹ Hoba re fumane grizzly, ra khutla re theoha, eaba o re, "'Me u re linaka tseo . . ." Ho re, "Haeba bolelele ba linaka tseo e le di-inchi tse mashome a mane a metso e 'meli, Moena Branham, ke tlil'o akheha."

⁷⁰ Ka re, "Ha u a tlameha ho akheha. Empa, bolelele ba tsona ke di-inchi tse mashome a mane a metso e 'meli, li joalo." Eaba re theohela mono . . .

⁷¹ 'Me ka nahana, ponong . . . Lōna baena ba phahamisitseng matsoho a lōna, le likhaitseli, nakoana e fetileng, lōna ba nkutloileng ke e phetha pele e etsahala. Ke itse e tšoanetse e be e ne e le Billy Paul. E ne e le moshanyana e monyenyan. Na bohole le sa nkhopola ke rialo, 'letsohoana le itseng?' Empa lilemo tsa moshanyana oa hae li leshome le metso e robeli, 'me o lekana le Billy Paul. Ua bona?

⁷² 'Me ha ke fihla tlase mono, keha Eddie a eme mono a apere hempe e tala, e mebala. Ke bone letsoho leo le potoloha linaka tseo, hoba a tlohe ho lata teipi a lekanya, a e robatsa mono, le ho tšoara, moshanyana eo o ile a beha matsoho a hae. Ka re, "Sheba, Eddie, matsohoana ao holim'a lenaka." 'Me ha a hula liekanyo tsa teipi tjena, a ncheba a hlile a soefetse molomong, a re, "Moena Branham, sheba mona! Botsekeng hantle feela, ke di-inchi tse mashome a mane a metso e 'meli, hantle!"

⁷³ U ka re, "Moena Branham, u e buelang nakong ea sekolo sa Sontaha?"

⁷⁴ Ke bua sena ka morero ona. Morao Testamenteng ea Khale, bahale ba khale le baporofeta ba bao ba iketseng, ba rapetse Molimo oa Leholimō, O ba bontšitseng lipono tseo. Ba ne ba rata Molimo, ka mohau oa Hae, o ba ratile. Ba ne ba batla Motse nqa e 'ngoe. Ntho e leng ka ho bona! Ba tètse malapa a bona ba eba bajaki, hobane ba batlile Motse nqa e 'ngoe. Ba boletse lintho tseo re li bonang li hlaha kajeno.

⁷⁵ Ona Molimo O ba ratileng, 'me ka mohau oa Oona, oa ba etsetsa lintho tseo, ke Molimo oo re o sebeletsang mona tabernakeleng hoseng hona, o etsa lintho tse tšoanang. 'Me ka sefubeng sa rōna, e teng, takatso ea Motse oo, 'nqa moo ba ileng teng. 'Me ka Lentsoe la Hae le ka lipontšo tsa Matla a Hae, ka Moea o tšoanang le ka liporofeto tse tšoanang, eona ntho eo A e entseng ho bona morao koana, O re etsetsa eona kajeno. 'Me le e bona ka kholiso e sa tlaileng, hore ke Molimo le 'Nete ea Molimo.

⁷⁶ Ka hona, e leng hore Motse o moholo o hokae, moo ba phuthehetseng teng, ke lebeletse ho bona 'mè eo oa ka ea shoang, le lōna bohle 'moho le bona, koana Motseng 'moho le bao: Abrahama, Isaaka, Jakobo, Daniele, Esaia, Jeremia. Hobane, Molimo oa mohau o ba ratileng, oa ba bontša lipono, oa ba bontša lintho tse tlang, ke Molimo o re etsetsang joalo kajeno, 'Nete e sa tlaileng! Eona, ke 'Nete, motsoalle.

⁷⁷ Ntata rōna oa Leholimō, re leboha haholo. Lebaka leo U batlileng ho mpontša lintho tseo, kea kholoa, Morena, U ne u mpa u nkhotthatsa, ka ho tseba matsoalo a tlang. Ha ke tsebe; ho tseba Uena. 'Me kea tseba ha ke sa le moshanyana. Ha ke moshanyana ea neng a itšoarella ka foresekoto ea mama. Joale ke monna oa lilemo tse bohareng. Oh, kea U rata, Morena! Kamoo ke U lumelang! Re hauhele joale. Re thusé ho ruta Lentsoe la Hao, ba bang ba tle ba bone 'me ba ithute, ba tsebe Uena. Re kopa ka Lebitso la Jesu. Amen.

⁷⁸ Bakeng sa therō, hoseng hona. Kea kholoa ke phetho seo ke neng ke se tšoere, feela... Be, litšebeletso tsa bosiu bona, selallo, hlatsuo-maoto, le joalo-joalo, ke phetho. Ke le memme ho lula le rōna. Empa, bakeng sa therō ea rōna hoseng hona, ha re phetleng Bibeleng, ho Santa Mattheu, khaolo ea 3, ho bala karoloana ea Mangolo. Ke batla ho qala ka temana ea 10 ea khaolo ea 3 ea Santa Mattheu.

⁷⁹ 'Me ke tseba ho eme ba bangata, 'me ha re batle joalo; empa bang ba tla lulisan le bona, hang ka nako. Ke... Le ntšoarele, ho nka nako ea ka, empa ke... Lea utloisia. Joale palo ea Lengolo.

...joale selepe se se se beiloe metsong ea sefate: sefate
ka seng se sa beheng tholoana tse molemo se tla rengoa,
se lahleloe mollong.

Ha e le 'na ke le kolobelletsa pako ka metsi feela: empa
ea tlang ka morao ho 'na o mpheta ka matla, 'me ha kea
lokela ho mo nkela lieta: ke eèna ea tla le kolobetsa ka
Moea o Halalelang, le ka mollo:

Seoloso sa hae se letshong la hae... o tla fiela seotlo
sa hae ruri, a bokelle koro ea hae molikong; mooko oona
a o chese mollong o sa timeng.

Mohlang oo Jesu oa Galelea a tla Jordane... ho
kolobetsoa ke eèna.

Empa Johanne a hanelo ho eèna, a re, ke 'na ke tšoanetseng ho kolobetsoa ke uena, 'me u tla ho 'na?

Empa Jesu a mo araba a re ho eèna, Ntumelle joale: hobane e ka khona re phete joalo ho lokelang hohle. 'Me a mo lesa.

⁸⁰ Ke rata ho nka therō ho tsoa lentsoeng leo mono temaneng ea 15.

... *Ntumelle joale: hobane re loketse re phete joalo ho lokelang hohle.*

⁸¹ Ke ipotsitse khafetsa, hobaneng Jesu oa Nazaretha... 'Me ke e botsitsoe hangata. Hore'ng Monna ea kang Jesu a tlameha ho kolobetsoa? Hore'ng Motho enoa a tlameha ho kolobetsoa ketsong ea pako le ea maipolelo, athe O ne a halalela, a se na sekoli, Mora ea sa silafalang oa Molimo o phelang? Hore'ng Motho enoa a ne a tlameha ho kolobetsoa joaloka monna ea tlang? Kolobetso e latela maipolelo. O ne a sa tlamehe ho ipolela letho, hobane E ne e le Molimo. 'Me, Eèna, hore'ng A tlameha ho kolobetsoa e ka hojane A etsetsa, "pakong," hobane O ne a sa hloke ho baka, hobane E ne e le Molimo o sa tlaileng? "O ne a lefatšeng, 'me lefatše le entsoe ke Eèna, 'me lefatše ha lea Mo tseba." Hore'ng A ne a tlameha ho kolobetsoa?

⁸² 'Me na le lemohile polelo pele ho eo? Ho itsoe:

... *e ka khona re phete joalo ho lokelang hohle.*

⁸³ Ka mantsoe a mang, "E ka khona e phetisoe! Lentsoe lohle le boletseng ke Molimo, le tšoanelo ho phetisoa!" Molimo o ke ke oa bolela letho le sa phethahale. Haeba A Le buile, ke mosebetsi o phethiloeng. E se e qetiloe ha Molimo a Le bua. Molimo ha o bue letho pele A itokisitse hore ho be joalo; 'me, mohla A buang, e itšoanelo leha e etsahetse.

⁸⁴ Joale, haeba taba eo e ke ke ea re hahela motheo ho thea tumelo hoseng hona! Molimo ha o bua Lentsoe, e se e phetiloe. 'Me ho ka thoeng ka lipallo tsa Oona tseo O re neileng tsona? Sohle seo O se boletseng, ke mosebetsi o phethiloeng. Ka hona, ha ho le joalo, ha re amohela Lentsoe la Oona pelōng tsa rōna, e—e se e phethiloe, e se e qetiloe!

⁸⁵ 'Me ebe hore'ng Eèna (ha e arabele potso) a ka kolobetsoa? Ba bangata ba itse, "Khele, O kolobelitsoe hobane E ne e le mohlala oa rōna." Ke 'nete, ho fihlela maemong a itseng, sebakeng se itseng. Ke 'nete, empa ha se 'Nete eohle.

⁸⁶ 'Nete ea eona, ke hore E ne e le papiso-maleba, E ne e le Moprista e Moholo. 'Me pele moprista e moholo a tlotsoa, o ne a tlameha ho hlatsua.

⁸⁷ 'Me ke batla ho le balla Lengolo le itseng, nakoana feela, koana Bukeng ea Exoda. 'Me kea kholoa ke temana ea 29 eo ke e ngotseng; khaolo ea 29, ke rialo. 'Me ke batla ho qala mona ka temana ea 4 ea khaolo ea 29.

U tla atametsa Aarone le bara ba hae monyako oa tente ea pokano, u tla ba hlatsoe ka metsi.

...u tla nka—u tla nka liaparo, 'me u apese Aarone, 'me kobo, le kojoana...le efoda, le efoda, le mokhajoana, oo u tla ho u tlama holim'a hae ka senyepa sa efoda:

U tla mo roetsa moqhoele hloohong, 'me holimo moqhoeeleng...holim'a ona...u bee lebenyane le khethhehileng.

'Me u tla nka ole ea setlolo, u e tšollele hloohong ea hae, u mo tlotse.

⁸⁸ Ua bona, Aarone, moprista e moholo, pele a tlotsoa, a tlameha ho hlatsua ka metsi. Ka baka leo, mohla Jesu, pele A ka tlotsetsoa, Moprista oa rōna e Moholo, O hlatoitsoe ka metsi.

⁸⁹ Eaba Ole eo ea tlolo e tšolleloa holim'a Hae, ho Mo tlotsa. Joaloka Aarone ha a tlotsitsoe ka ole; O tlotsitsoe ka Moea o Halalelang. "Hobane Johanne o pakile, a bona Moea oa Molimo o theoha joalo leeba, o lula holim'a Hae; eaba Lentsoe le re, 'Enoa ke Mora oa Ka ea ratoang Eo Ke khahlisoang ke ho lula ho Eèna." Ka baka leo Bibele e boletse, "Jesu eaba o tlotsoa ka Moea o Halalelang, a ea hohle a etsa ho lokileng." Ua bona, O ne a tlotsitsoe.

⁹⁰ Le pele A tlotsoa, A tlameha ho phetisa ho loka hohle. Ua bona, A tlameha ho hlatsua ka metsi pele Tlolo e behoa holim'a Hae.

⁹¹ 'Me ke papiso e khabane ea rōna kajeno, joaloka baprista ba Molimo. Re tlameha ho kolobetsoa pele, ho ipolela libe tsa rōna le ho kolobetsoa Lebitsong la Jesu Kreste, ho hlatsua libe tsa rōna; 'me u ntso amohela Tlolo, neo ea Moea o Halalelang. Ua bona, ho hlatsua pele, e ntso ba tlolo ea tšebele. Ha ho moreri ea tlamehang ho hloella sefala pele a kolobetsoa ka Lebitso la Jesu Kreste. Hobane, ntho e 'ngoe feela... Tšoarelo ea libe e tlile ka Lebitso la Jesu Kreste feela, che, ha ho lebitso le leng tlas'a Leholumō le filoeng batho. "Pako le tšoarelo ea libe e tlameha ho rutoa ka Lebitso la Hae, ho qala Jerusalema." Ke hona moo Moea o Halalelang o tšolotsoeng le ho tlotsa, pele. Ka hona, moreri kapa molumeli o tšoanetse pele ho hlatsua libe tsa Hae, ka Lebitso la Jesu Kreste; le ho tlotsoa ka Moea o Halalelang, ho hlahisa bopaki ba Molimo.

⁹² 'Me Kreste e ne e le bopaki ba Molimo, hobane Molimo o no o le ho Kreste, o boelanya lefatše le Oona. Joale O itse:

...Lumella hona ho be joalo, Johanne. Ke hantle.

⁹³ Ka mantsoe a mang, "Johanne, u monna oa senatla, u moholo, moperofeta ea matla. 'Me tšenolo ea hao ka 'Na ehlile e nèpile. Ua Ntseba na Ke Mang. U a tseba, hobane bosebeletsi ba hao ha bo tsoe ho motho. Bosebeletsi ba hao bo tsoile ho

Molimo. Ha u a bo rutoa ke motho. Taba ena ha u a e rutoa seminareng. Empa koana, lilemong tse robōng, ua kena feelleng, hobane u tsoetsoe ka ho ikhetha, ngoana ea mohlolo. 'Me hona tsoalong ea hao, Molimo o qalile o sebetsana le uena. 'Me esita le pele u tsoaloa, mporofeta o u bone. 'Me u leseli la letsatsi lena. 'Me koana feelleng... U tseba hoba Ke Mang, hobane Molimo, feelleng, o u boleletse hoba pontšo e tla Ntšala morao. 'Me u se u E bone, 'me u a e tseba. 'Me re a tsebana hoba re bomang. Rea tsebana. 'Me ke 'nete u tlameha ho kolobetsoa ke 'Na. Empa lumella joalo, hoba, Johanne, haeba re le maseli a letsatsi lena, re tšoanelia ho phethisa ho loka hohle. Lentsoe lohle la Molimo le tlameha ho phethisoa ke rōna, bakeng sa letsatsi lena, hoba re loketse joalo; rea tlameha, ke tšoanelo, ho a re lokela. Hoba haeba re le lipaki tsa Molimo tsa 'nete kajeno, Johanne, re maseli a sena; mongoaha. 'Me haeba re le maseli a mongoaha ona, e ka khona ho tlatsoe Lengolo le le kaalo mongoaheng ona. 'Me e itsetlehile ka rōna!" Alleluia! "E tlamme rōna, ho bona hoba ho loka hohle ha Molimo ho a phehisoa."

'Me ho loka ha Oona ke hofe? Lentsoe la Oona!

⁹⁴ Ka mantsoe a mang, "Johanne, u tseba hoba Ke Mang. Ke Moprista e Moholo. Ke 'nete, Johanne, Ke hloka ho kolobetsoa ke uena. Empa re loketse ho phethisa ho loka hohle. 'Me ke lokela ho kolobetsoa ke uena joale, ho phethisa Lentsoe la Molimo, hoba Lentsoe lohle le tlameha ho phethisoa. 'Me re maseli a letsatsi, 'me ho ho rōna ho phethisa hona hohle. 'Me Ke tseba ho loka ha hao le takatso ea hao e le ho phethisa Lentsoe. Re loketse joalo. Rōna re maseli."

⁹⁵ Leseli la mongoaha ka mong le loketse joalo. Re tseba se tlamehang ho phethoa. Lōna batho ba moea le tseba Lentsoe la Molimo, le bona seo Molimo a se tsepisitseng. Joale Lentsoe le ke ke la tla habobebe feela, empa Le tla ka ho lemoahuoa, u tlameha ho Le kena ka matla. Empa, leha ho le joalo, e ka khona rōna, re loketse ho phethisa ho loka hohle ha Molimo. Re tšoanelia ho etsa hoo.

⁹⁶ 'Me joale Jesu o lemoihile, ka ho Johanne, hore Johanne e ne e le moporofeta oa sebele. Lentsoe le buile ka Johanne, 'me O mo tsebile e le moporofeta oa hora ka 'nete. Le Johanne o tsebile Jesu e le Messia, oa hora. 'Me bobeli ba utloisia ka ho hlaka.

⁹⁷ Oh, hola Kereke ea Molimo o phelang e ka e kenya lihloohong tsa bona hoseng hona, le lipelōng tsa bona; hore ha se tšoanelo ha Kereke e aroloa ka meeli ea malumeli, liphapang tsa litumeoana le mebalia, le tse joalo; re tle re teane 'moho ka Lebitso la Morena Jesu, ho se letho le re tlosang Lentsoeng la makhonthe la Molimo o phelang; le ho tsamaea ka kotloloho ho theoha ka tsela ea Lengolo leo, ho phethisa ho loka hohle ha Molimo hoa kajeno!

⁹⁸ Hoba, mang le mang o tseba re phela nakong ea Maseli a mantsiboea. Moporofeta o boletse, "Leseli le tla chaba nakong ea

mantsiboea.” ’Me rea tseba re phela horeng eo, hora ea Maseli a mantsiboea. Ka hona, Morena Molimo, a re thuse ho lemoha seo.

⁹⁹ Ha re khutleng nakoana, re qotse batho ba tsebileng maemo a bona a letsatsi la bona, ’me ba ikemiselitse ho nyanya linyatso kapa ntho efe e sele, hore Lentsoe la Molimo le phethisoe.

¹⁰⁰ Ha re nkeng, ho tea mohlala, Nohe le letsatsi la hae. Nohe o ne a loketse joalo, hoba a kopane le Molimo ’me a tsebe leano la Molimo la letsatsi.

¹⁰¹ Joale, u ke ke ua etsa letho pele u tseba seo u se etsang. U tšoanelo ho e tseba e le thato ea Molimo. U tšoanelo ho e tseba e le leano la Hae le takatso ea Hae, ’me u e senoletsoe, joale ha ho letho le tläng ho e thibela.

¹⁰² Joale, Nohe o tsebile, ka ha bosebeletsi ba hae bo sa tsoa sekolong se itseng sa thuto, empa o qoqile lifahleho li talimane le Molimo. ’Me a tseba moroallo o tla fihla. A tseba lipula li tla tšoloha libakeng tse holimo, joaloka linoka tse thibolohang, leha e le khahlano le llithepa tsa mahlale a letsatsi leo e tiile. Borasaense, ntle le pelaelo, ba seholotse. Nohe, ha thoe, “Re ka u kholisetsa eona ka saense hore metsi ha a eo holimo mono.”

¹⁰³ Hoba, mohlang oo e be e le mongoaha o moholo, o fetang oa rōna kajeno ka boholo, ba hatetse pele mahlaleng ho re feta kajeno. Ua tseba, Jesu o buile ka eona, “Joaloka matsatsing a Nohe.” Ba hahile difinkse le dipiramide, le lintho tseo re ke keng ra li ama, ho li haha kajeno. ’Me e le borasaense ba linatla. Ba tsoaka mebal le lintho, le mekelikeli e nokang litopo, letsatsing leo, ba khonne ho sireletsa setopo. Re ka sitoa kajeno le holane re tšoanetse. Ba hatetse pele ho re feta. ’Me ba ka kholisa metsi a le sieo holimo mono.

¹⁰⁴ Empa, ka ho tšoana, Nohe o ne a loketse, hoba a tsebe leano la Molimo, eaba o tea areka, ka ho tšoana, hoba a tsebile e le areka eo feela e tläng ho sesisa. Ho sa tsottelehe, leha metsi a pakiloe a le sieo mono ka mahlale; ha Lentsoe la Molimo le itse pula e tla na, pula e tla na.

¹⁰⁵ ’Me nka emissa mona ho bua sena, molemong oa bakuli. Ha bothata ba hao bo mpefetse hoo ngaka e timileng tšepo; phapang ke efe, ha feela Molimo a u bolella, “Ke tla u lumella ho phela”?

¹⁰⁶ Hoo ho etsang... Ngaka kapa rasaense oa mofuta ea reng, “Borapeli boo u ipolelang bona, Moea o Halalelang, le ho bua ha hao ka lipuo, le ea hao—le liponahatso tsa hao, ke sethetsa-kelello feela.” Ho re, “Ha u a tlatsoa ka Moea o Halalelang.” Ho re, “Ha ho ntho e joalo.” Homme tšebetso ea balisa ba bangata e rialo kajeno, ho thoe, “U fehluoe feela.” Ho re, “Ntho e joalo ha e eo.”

¹⁰⁷ ’Me ho joalo, ba bang ba itse ho ’na, “Hore’ng u sa ingolise le mokhatlo o itseng o lokileng, ua sebelisa boiphihlelo ba hao ho ntšeletsa mokhatlo oo oa bolumeli?”

¹⁰⁸ Ebe ho thoe, “Joale, seholpha sena seo u imatantseng le sona sa bapholosoa, ke mphi ea balumeli ba moshaqane. ’Me ba—ba . . . Ntho e joalo ha e eo. Ba mpa ba fuluoel kelello. Ba—ba—ha ba tšoara seo ba buang ka sona. Re ka paka hore ha ba tšoara letho.”

¹⁰⁹ Oh, moena, u siiloe ke nako. Re tseba seo re se tšoereng! Re tsoetsoe labobel, ke Moea o Halalelang, ’me re bona mesebetsi ea Hae har’ a rōna hantle, joaloka mehleng ea Bibele. Haeba le lumela Moea o Halalelang o tšoanang, hore’ng A sa sebetse ka ho tšoana kerekeng ea hao? Hoba, A ke ke a fetoha; Ke Molimo.

¹¹⁰ Ka hona, ho sa tsotellehe likholiso tse hlahang tsa mahlale, ho thoe re “batho ba maikutlo feela,” ho thoe “ha rea itekanel ka lellong,” ho thoe “ehlile ha ho letho borapeling bo boholo bona” ba rōna, ho re “ha—ha bo seo bo tlamehileng ho ba sona,” le ka mokhoa oo, ho thoe re “re seholpha sa lilahloa,” u se e lumele! U se ke ua e lumela!

¹¹¹ Ha morali oa hao a fihla lapeng a tsoa sekolong, le ho re, “Mama, re pakile, kajeno, ho thoe e—e lehata la motho le tšoana le la shimpanzi hantle, ua bona.” Kapa, “Re—re balile ’me—’me rea tseba bohole re tsoa seleng e le ’ngoe, ho thoe re mpa re le liphoofolo fela.” U se ke ua lumela seo!

¹¹² ’Me ho sa tsotellehe seo motho a se buang, moithuti oa bolumeli, ngaka efe, rasaense ofe, moruti ofe; tiisetla Lentsoe la Molimo! Hoba, hopola, re ntse re haha, joaloka, Nohe letsatsing la hae, re ntse re aha Areka.

¹¹³ ’Me Nohe a tseba haeba a sa qete ho haha areka eo, ha se lelapa la hae feela le sa tl’o bolokeha. Ka hona, o tsebile leano la Molimo. Har’ a linyatso, ha e a mo khathatsa ka letho. A ’na a tea areka eo.

¹¹⁴ Ka hona, ho sa tsotellehe ba bua hakae, “Ha ho ntho e kang kolobetso ea Moea o Halalelang. Ha ho letho, le kang pholiso ea Khalalelo.” Re loketse joalo, re tlamehile, ho phetha ho loka hohle, ho ema horeng ena ea teko, le ho tea Areka ea Morena!

¹¹⁵ Ba re, “Moena, u ferekane likolobetsong tsa hao, le tsohle tse joalo. Ho na le . . . Ha u a tlameha ho kolobetsoa ka Lebitso la Morena Jesu.”

¹¹⁶ Ke ne ke qoqa le ba babeli bosiu bo fetseng. ’Me ke mohlankana ea sa tsoa kolobetsoa, ’me o lumela ho Molimo a le mong feela. Eaba ba mo hanela ho paka kopanong ea Banna Borakhoebo, hobane ha a lumele ho Melimo e merarō.

¹¹⁷ Joale, ho sa tsotellehe seo ba se buang, rōna re loketse joalo, rōna re tlamehile joalo, ho phetha ho loketseng hohle. Lentsoe le tla sala le lokile mohla lilekane tsa Banna Borakhoebo li leng sieo le tsohle li fetileng, ’me likereke ha li sa tla ba teng. Lentsoe la Molimo le tla lula kamehla! Re tlameha ho phetha ho loketseng hohle.

¹¹⁸ Na baporofeta ha ba porofeta ka letsatsi lee? Le hopole, baseħollı̠ bao, ba tlamehile joalo ho phethisa hoo, le bona, hobane eka khona e phethisoe, hape.

¹¹⁹ Empa, Nohe, a se ke a e natsa, a tsoella hantle hoba a tsebile leano la Molimo. O tsebile seo Molimo a tlang ho se etsa, Moena Kidd. O tsebile moralo oa Molimo hobane o qoqile le Molimo, 'me e ne e le ho latela Lentsoe la Molimo, 'me a tsoelapele a e etsa, le hona. Leha mahlale a ka e kholisa kapa ntho efe, kapa nyefolo e behiloeng holim'a Nohe, a tsepama le Lentsoe la Molimo hantle, 'me a otrella hantle. Hobaneng? O ne a loketse, hobane Nohe e ne e le moporofeta. 'Me o ne a loketse joalo ho boloka, Lentsoe la Molimo. O ile a e tiisetsa.

¹²⁰ Eka khona moporofeta e mong le e mong, moporofeta oa 'nete oa Molimo, o loketse ho tsepama le Lentsoe. Ho sa tsottelehe seo mahlale a ka se buang, le seo *sena* se ka pakang mabapi le *sena*, kapa joalo, e ka—e ka khona a phethise ho loketseng hohle.

¹²¹ [Moena Branham o bala tlhahiso leseling ka khutso—Mohl.] Ho lokile. Ba nthomeletse tlhokomeliso ho rapella mom hang-hang. "Mo rappelleng joale. Lingaka li sa tsoa tsamaea." Ho lokile.

¹²² Joale, Morena Jesu, ke eme mona. Eo ke 'mè oa ka. Haeba a tsamaea, ke nehela moea oa hae matsohong a Molimo. Empa Molaetsa ke ona o tlameha ho tsoelapele, Morena. Ba teng ba phelang mona ba tlang—ba tlang ho shoa. U nthuse, Morena. Ke oa Hao. Ka Lebitso la Jesu.

¹²³ Re loketse joalo! Le 'na ke loketse joalo joale ho phetha ho loketseng hohle. Lentsoe la Molimo le tlide pele! Ha ho lerato le kang lerato la Molimo!

¹²⁴ Joale, Nohe, ho sa tsottelehe nyatso e holim'a ntate Nohe, o tsebile moo a emeng teng, 'me eaba o ema le Lentsoe. 'Me o ahile areka ho pholosa ba lelapa la hae, hobane o ne a loketse joalo. Nohe o ne a loketse, ho—ho etsa joalo.

¹²⁵ Mokreste e mong le e mong o loketse ho tsepama Lentsoeng. Hantle haholo. Ho tsepama le Lentsoe la Molimo! Maholimō le lefatše li tla feta, le uena u tla feta, ke tla feta, likereke li tla feta, mekhatlo e tla feta. Empa Lentsoe la Molimo le ke ke la feta! Tšepahala, moeti ea tšepehang!

¹²⁶ Matsatsing a Henoke, pele feela ho moroallo, mohla Henoke a shebang koana a bona Nohe a haha areka eo. Henoke e ne e le moporofeta. Henoke a itseba hoba ke papiso. 'Me o tsebile, le pele moroallo o fihla, o tlameha ho beha mohlala, ka baka leo thapama e 'ngoe a tlameha ho tsamaea. A tlameha ho tsamaea tjena le Molimo. 'Me, ka mokhoa oa horeng, mohlang oo a fetola ea hae. Sebakeng sa ho potoloha leralla, a kena 'Mileng oa Khosi, a 'na a tsamaea feela. "Me ha ba ka ba mo fumana, hoba o ne a le sieo," empa o ne a nyolohile ka 'Mila oa Khosi!

¹²⁷ Oho Molimo, ha nke ke tšoane le Henoke! Mohla hora eo ke tlamehang ho nka tsela, ke fumane 'Mila oa Khosi!

¹²⁸ Ke bona Henoke. O tsebile a loketse ke hona, hobane e ne e le moporofeta, 'me o tsebile se tlang ho hlaha. Ka hona, ke 'mono a aka mohats'ae a kopa tsela, le ho re, "Moratuo, ke tla u bona hamorao." Ho tšoara bana ba hae, a ba aka a kopa tsela; a atamela mora oa hae ea nyetseng le morali oa hae ea nyetsoeng, a ba aka a ba salisa hantle.

¹²⁹ Ba re, "U ea kae, ntate? U sa il'o ithapolla ka ho tsamaea na?"

"E, ke sa tla ithapolla ke tsama-tsamaela."

¹³⁰ Empa ha a nka tsela ea khale, ea tloaelo tsatsing leo. A nka 'Mila oa Khosi, 'me a ea Khanyeng. O ne a loketse ho phethisa hoo. A sa batle ho tsamaea, empa a loketse ho phetha ho loketseng hohle. Hoba, e ne e le papiso ea Kereke kajeno. E ne e le papiso ea Kereke e tlang ho ithapolla thapama e 'ngoe, e 'ngoe ea lithapama tsena. Re tlil'o hata re kena 'Mileng oa Khosi, 'me re tla falla!

¹³¹ Yaa, Nohe o ne a loketse, Henoke o ne a loketse, ho phethisa ho loketseng hohle.

¹³² Hape ke batla ho bua ka monna e mong mona. Monna ea bitsoang Daniele. 'Me o phetse letsatsing la linyefolo. Ua tseba, Bana ba Israele ba ne ba koetetsoe lehaeng la bona, ho kena tlase Babilona, 'me ba hloname, 'me ba qetile lilemo tse mashome a supileng tlase mono. Empa ba theohetse teng le moporofeta e mocha, ea bitsoang Daniele.

¹³³ 'Me a tšoere sehlotšoana, baena ba tlalang seatla feela, ba kopane ba ikhethetse Molimo, hore ba ke ke ba itšilafatsa ka hoo—ka hoo temalo ea letsatsi la joale. Ba ke ke ba iteanya le linama tsa khosi. Ba ke ke ba noa lino tsa hae bohale. Ba ke ke ba kenela mekete ea hae. Empa ba tla ipoloa ba halalela ba inehetse Molimo, hobane ba ne ba loketse joalo!

¹³⁴ Daniele o ne a loketse joalo, hoba e ne e le moporofeta, ho tsepama Lentsoeng.

¹³⁵ Moporofeta ofe oa makhonthe ea tsebang Lentsoe la Molimo, hore... Haeba a sa tsebe Lentsoe la Molimo, e ka be eba ha se moporofeta oa 'nete. Moporofeta oa 'nete o tsepama le Lentsoe. Sohle seo Lentsoe le se buang, ba tsepama le Lona. Ho sa tsottelehe temalo ea letsatsi, kapa seo—seo kereke ea sejaole e se buang, kapa seo motho a se buang, kapa seo motho e mong a se etsang, moporofeta oa 'nete o tsepama le Lentsoe hantle.

¹³⁶ 'Me Daniele o tsebile, haeba a tiisetsa Lentsoe, se tlang ho mo hlahela. O tla lahleheloa ke botumo ba hae. O tla lahleheloa ke setsoalle sa hae le baena bohle. O tla lahleheloa ke lintho tse ngata. Empa ba behile molao, o reng, ba tla rapela molimo o ikhethileng, ka mora moo ba ka ea rapela molimo ofe.

¹³⁷ Empa ua tseba, e teng ntho e khemang le Eona, Molimo, ha re tenyetsehe ka Molimo. Ha ho tenye-...ho tenyetseha, ka Molimo. Molimo o ituletse e le Molimo feela! Ha O a re lebella, ka Sontaha, ho ba Bakreste, ba Mo rorisang ba Mo rapelang; 'me, ka Mantaha, re qekise re e itšola, ka mehopolo ea mefuta eohle, e reng, "Mohlomong ke fositse, 'me hola ka etsa *sena kapa sane*." Re tsepama setsing sa Lentsoe la Molimo hantle, re Le tiisetsa ka thata!

¹³⁸ Ka hona re fihlela, Daniele, a ne a loketse joalo, joaloka moporofeta, ho tsepama Lentsoeng, ho sa tsotellehe! Eaba ho phatlalatsoa taelo, ha thoe, "Ekare ha e mong a rapela molimo osele, kathoko ho molimo oo ba o khethileng." Ka mantsoe a mang, "Ha u sa hate 'moho le rōna, re tla u lahlela lemeneng la litau." Be, Daniele o ne a loketse joalo, a loketse ho phetha ho lokelang hohle, ho se rapele molimo o mong, kapa ho ithara ka lefatše; ha e se ho Molimo o inotsi! Ka hona, eaba o bula mahlabaphefo a a phetla, a phahamisa likharetene, a sheba Bochabatsatsi, a rapela hararō ka letsati, ka tloaelo ea hae ka mehla. Hobaneng? A sa khukhunele nqa e 'ngoe ho ipata, ho etsa joalo, feela a phetla lifesetere; a tle a bonoe ke bohle, ba batlang joalo. A se lihlong ka borapeli ba hae.

¹³⁹ Hobane, Mokreste o loketse hona ho se be lihlong ka borapeli ba hae. Kamoo Pauluse, oa khale, a buileng, "Ka mokhoa o reiloeng bohlanya, bokhelohi, ke rapela Molimo oa bontata rōna joalo." Ua bona? "Ha ke lihlong ka Evangelie ea Jesu Kreste," o boletse, "hoba ke Matla a Molimo a isang polokong, ho e mong le e mong ea E lumelang." Ke hantle, ho se be lihlong ka Evangelie! Ke eona tšetleli lihoreng ha sekepe se khohlopeha 'me ho sa bonahale le naleli, le khoeli le linaléli, 'me ho foka lifeo tse matla. E a setlela, hoba ke Evangelie ea Jesu Kreste!

Daniele o ne a tšepahetse. O ne a loketse hona.

¹⁴⁰ Bana ba Baheberu, ba ne ba loketse hona, ba loketse hona, hoba ba ba emele Molimo. Ba ne ba loketsoe ke hona. Ha ba ka ba tsotella sebopi sa mollo. Tlas'a liteko tse boima, ba tsotella'ng? Ba ne ba nkile kemo!

¹⁴¹ Oho Molimo, hola Bakreste ba ka e bona feela! "Ke khetha tsela ea bakhesuoa ba 'maloa ba Morena. Ke qalile le Jesu, oho Morena, nkuke, u mphetise." Tlas'a liteko, mathata, lipelō tse bohloko, lefu, maloetse, malhomola, ke tla lahlela lotho ea ka ho Jesu Kreste, ho ema! "Ke ema holim'a Kreste, Lefika le tiileng, Kea ema, mobu 'ohle ke lehlabathe le monyelang." Tsohle li a monyela. Mebuso e tla oa, le lichaba li pshatlehe, le malumeli a qhalane, le barutehi ba thutabomolimo ba tla shoa, empa Lentsoe la Molimo, le tla lula kamehla!

¹⁴² E, ba ne ba loketsoe ke hona ho ema. 'Me ba ne ba loketsoe ke hona, ka mora hoba ba eme, ho tsitlallela kemo ea bona.

¹⁴³ Ha u fihla hoseng hona, u lumela hoba Molimo o tla u folisa, 'me u ema, u loketsoe ke hona ho se pake letho khahlano le eona; kapa, u se ke ua tla. Ke hantle. Ha u sa utloe Molimo a tla u folisa, u se ke ua tla, u e fetola sesomo.

¹⁴⁴ Haeba u utloa, hoseng hona ha ho memeloa aletare, ho thoe, "Ke batla ho emela Kreste." Haeba u ikutloa, lekanya moputso oa hao; u bala banna ba hao, ho bona haeba u khona ho ea ntoeng. Ho bona haeba u itokisitse. Ha u ikutloa u sa loka, u se ke ua tla. Empa ha Ntho e u bolella, "Lena ke letsatsi la ka, hoseng hona ke hoa ka," u tla tla 'me u lule mono ka mehla! U se ke ua sisinyeha le ka mohla, leha lefu le u tjamela, mohuli o phutla sefahleho sa hao. U tsotella'ng? Ema mono! Hoba, "Maholimō le lefatše li tla feta; Mantsoe a Ka a ke ke a hlolleha!" U tla tsepama le Eona.

¹⁴⁵ Ha u re, "Ke lumela Jesu Kreste joaloka Mofolisi oa ka. Kea lumela, hoseng hona, hore O tla folisa 'mele oa ka o kulang. Ntho e mpoleletse ho tla kerekeng. Mona ke har'a balumeli. Kea ema, hoseng hona. Kea E lumela! Kea nyoloha ho ea rapelloa. Ka mora ho rapelloa, ke tla ema mono ke lule! Che, leha ho fifala haholo, kapa kae feela, ke tla tiisetka kemo eo." U nkile kemo kahobane u loketse joalo.

¹⁴⁶ Hang ha u ipoletse, u tšoanelo ho tiisetka maipolelo a hao. Ke hantle. U loketse joalo, joaloka Mokreste, joaloka molumeli, ho tiisetka kholiseho ea hao.

¹⁴⁷ U se lumelle diabolosi ho u sutumeletsa *mona* le *mane*. U lula u phariloe ke seretse. U lula o fapohile tsela e khōlō. U lula u le kahare le kantle. 'Me ke ka baka leo u sa khoneng ho ema kae feela. Ha u khone ho itšepa. Kapa, ha u khone, ha ho motho ea ka u tšepang. U tlameha ho ema! 'Me ha u entse tsohle tseo u li khonang ho ema, ema ke hona! Lula u eme! Ke hantle. Re tšoanelo ho etsa joalo. Re loketse joalo. Re tlamehile joalo, ho etsa hoo.

¹⁴⁸ Elia o ne a loketse hona, e ne e le tlameho ho Elia moporofeta, ho emela kemo ea hae ho phethahatsa Lentsoe la Molimo, hobane o tsebile Lentsoe la Molimo. 'Me o tsebile hore arekabishopo enoa, Jezebele, 'me liphapang tsohle tsa malumeli a bona li ne li lohane le temalo ea lefatše. Elia o ne a tlamehile, joaloka moporofeta, ho ema. 'Me a ema a inotsi! Ho re ho Molimo, "Ba ile bohle, ke setse ke le mong feela, ke eme ke le mong." A tseba hakaalo feela. Molimo o boletse A bolokile ba 'maloa ba emeng joalo; mohlomong e se moo—moo Elia a leng teng, hoba sechaba se ne se mo tjametse. Ba sa nyatsuoje joaloka eèna, hoba bohle ba ne ba hlile ba mo kurutletsoa, hoba e ne e le moporofeta. Empa o ne a loketse joalo, har'a liteko, pontšeng ea nyatso, pontšeng ea monyemo; Elia o ne a loketse joalo, ka ho ba moporofeta, ho emela Molimo, le ho ema mono.

¹⁴⁹ Re loketse ho phetha ho loketseng hohle. Banna ba baholo bao, ba linatla, e ne e le seriti sa letsatsi lena mohla marapeli

a Jezebele le lintho li hlahang joale, lintho tseo re li tšoereng kajeno, ho leka ho hapa. Ke tšoanelo ea mohlanka oa Molimo, ho sa tsotellehe seo mang a se buang kapa se etsahalang, ema, hobane re tšoanetse ho emela Lentsoe.

¹⁵⁰ Elia o itsebile e le mopropfeta. O bone lipono. Molimo o mo nètefalistse e le mopropfeta. Ka hona ho sa tsotellehe haeba banaba'bo . . . Ho ne ho le mashome a likete; shebang Baiseraele feela, dimilione, batho ba ipoletseng ba lumela Jehova, ba ne ba—ba ne ba itlhophisitse. Ba tlohile ba khema le seojoale, joaloka bao kajeno. Ba khema le seojoale. Ba tenyetsehile Lentsoeng la Hae. Alleluia, empa o ne a loketse hona, Elia, hore a phethise ho loka hohle. Eaba o ema mono, a le mong, a hlab a mokhos i khahlano le bobe! Le haeba ba tlositse bophelo ba hae, e ka ba eng? O ne a loketse joalo, ho phethisa ho loketseng hohle. Bobe bo ne bo jele setsi naheng. Monyemo o ne o jelle setsi naheng. Liphoso tsa Mangolo li ne li jele setsi naheng. 'Me Elia o ne a loketse, ho phetha hohle ho loketseng, ho emela Jehova; eaba Jehova o emela Elia. Amen. O loketse joalo!

¹⁵¹ Abrahama. Abrahama o ne a loketse ho ikarola le ho se lumele. Molumeli ka mong u loketse ho ikarola le ho se lumele! Abrahama, o ne a loketse ho tsamaea naheng ea hae a le mong, eëna le Molimo, ba le bang, hoba e ne e le mopropfeta. Lefatse ha lea utoisisa khetho e joalo ea Abrahama. Hore'ng a tlohetse lehae la ha'bo? Hore'ng a tlohetse kereke ea hae? Hore'ng a tlohetse batho ba ha'bo? Hore'ng a entse bosaoana bo joalo, ho jaka naheng ese le ho se metsi kapa lijo? Hore'ng a kene mahoatateng a nyopileng moo batho ba esong ho ahe teng? Empa o ne a loketse joalo, hoba e ne e le mopropfeta, ho ikarola ho se lumeleng hohle, le ho tsamaea le Molimo ba le bang. Molimo o itse, "Ikarole, 'me 'na Ke tla u hlohonolofatsa."

¹⁵² Ha u ikarola ho se lumeleng hohle, Molimo o tla u hlohonolofatsa. 'Me e mong le e mong oa rôna o loketse joalo, ho sa tsotellehe moputso, ho ikarola lefatšeng la ho se lumele. "Tsoang ho bona, le ikhethé," ho rialo Molimo, "Ke tla le amohela." Re loketse joalo, joaloka banna le basali ba Molimo, ho nka kemo ea rôna horeng e lefifi ena eo re phelang ho eona.

¹⁵³ Abrahama, ho sa tsotellehe mehopolo e aba bang, a ikarola. Hobaneng? O bone Molimo. O bone pono. Pono e ne e lokile, pono e a etsahala. O tsebile Molimo a eme le eëna; Abrahama, ho hlahisa polelo e hlafetseng eo ea hae. Monna oa lilemo tse lekholo, le mohats'ae ea mashome a robõng, 'me e le nyopa 'me a omeletse, 'me ba tla fumana lesea lilemong tsena. Hobaneng, bongaka ba mahlale a letsatsi leo a ka be a 'mitsitse sethoto sa mofuta. Ba ka be ba 'mitsitse "lehlanya." Empa e ne e loketse joalo. Alleluia!

¹⁵⁴ Ka linako tse ling ke ntho e sa tloaeloang, haeba e khema le Lentsoe.

Molimo o buile le eèna, ha thoe, “Abrahama.”

Ho thoe, “E, Morena?”

¹⁵⁵ “Ke Molimo oa bontatao. Ke Molimo oa Bosafeleng. Ke El Shaddai; Ke Sefuba, Ke Letsoele, Ke Moaba-Matla. Ha Ke tsotelle kholo ea hao, Abrahama, e ka ba eng ho ‘Na? Ha Ke tsotelle ho nyopa ha hao kapa ha popelo ea hae, Ke tla u u mora.”

‘Me Abrahama o itse, “Kea U lumela, Molimo.” Alleluia!

¹⁵⁶ Bibele e boletse, “A se ke a sisinyeha tsepisong ea Molimo, ka ho se lumele, empa a ipha matla, a ntse a rorisa Molimo.” Hobaneng? O ne a loketse joalo. O ne a bone letsoho la Molimo le tsamaea, ka matla.

¹⁵⁷ Oh, uena Branham Tabernakele, re tla ikarabela ka polelo efe ka Letsatsi la Kahlolo? Athe, re bone letsoho la Hae le matla. Re bone Matla a Hae. Re bohile Khanya ea Hae. Re bone seo A se buileng; ha E hholehe le ka mohla. Re bone Botho ba Hae, Topallo ea Mollo e khòlò, Leseli le lopaletseng ka phaposing mona. Re Le bone koana, mahlale a Le katlatitse litšoantšo, le ntho eohle. Le ho utloa Molaetsa o tsoang, ka kotloloho hantle mocheng, “Ikaroleng ho bona! Le se ke la kenella ho se lumele hofe!” Re loketse ke hona, ho phethisa ho loka hohle.

¹⁵⁸ Abrahama o ipoletse e le mojaki le mofeti. A ke ke a etsa letho; a sa tsebe motho lefatšeng. O tsamaea le Molimo, hoba a ne a loketse joalo, hoba a ne a ‘Mone. Abrahama o ne a loketse joalo. Mohla marena ao ‘ohle a teanang mono, ua tseba, ho mo hlomamisa e le thaka le leholo; marena ‘ohle, ka mora tlholo e khòlò ena ea Abrahama, mohla marena a kopanang le eèna kantle mono, baena bohle ba mekhatlo ea malumeli, ha thoe, “Ua tseba, Abrahama, re tla—re tla tlabola selekane le uena. Re tla etsa *hore-le-hore*.”

¹⁵⁹ O itse, “Nke ke ka nka le leqhoele la seeta, ho ‘na; le tle le se re, ‘Ke entse Abrahama hore ho itseng.’”

¹⁶⁰ Oh, o ne a loketse joalo, hoba o tsebile (Alleluia) Molimo a mo hlapanyelitse, “Ke tla u nea nqalo eohle eo u e talimang: bochabela, leboea, bophirimela, kapa boroa.”

¹⁶¹ E ka ba eng haeba re fumana nikeli kapa dime, haeba re ja kapa re sa khone, le haeba re phela kapa re eshoa? Molimo o tsepisitse, “Ba bonolo ba tla ja lefa la lefatše.” Re loketse joalo, re tlamehile joalo, ho phela ka ho e etsisa, ho etsisa hona hoo, ke tsoanelo ho phethisa ho loka hohle. Molimo o batla banna le basali ba tlang ho ema ‘me ba phetha ho loka hohle! Ehlide, ho loka ke “Lentsoe la Hae.”

¹⁶² Joaloka ha ke buile qalong ea therò, Jesu o kolobelitsoe morero oo. Ho sa tsotellehe mokhoa...Athe O ipitsitse Mora oa Molimo, a ntano kolobeletsoa, tšoarelö ea libe? O ne a se na tsona. Empa A tlameha ho hlatsuoaa, hoba E ne e le Moprista e Moholo.

A tlamehile ho phethisa ho loketseng hohle. Ha thoe, "Lumella joalo, Johanne. Ke tseba hoba u a e tseba. Kea tseba hoba Kea e tseba. 'Me rea tsebana. Empa re tla e lumella joalo, empa re loketse joalo." Amen! Alleluia!

¹⁶³ Ke moo ke tlang ho khetha tsela ea bakhesuoa ba 'maloa ba Morena! Le 'na ke loketse joalo, le uena u loketse joalo, joaloka bahlanka ba Molimo, ho khetha tsela ea bakhesuoa ba 'maloa ba Morena; ho tsamaea ka borapeli, ka ho loka, khalalelo, bophelong bona ba joale; ho suthisa boima bofe bo re tšoasang habobebe; re ntse re shebile Moqali le Mophethi oa tumelo ea rōna, Jesu Kreste! Amen.

Abrahama o ne a loketse joalo, mohla a nyolohelang mono.

¹⁶⁴ 'Me Molimo o mo laetse, "Joale, nka moshanyana enoa. Joale lilemo tsa hao li lekholo le (ho ka thoe) mashome a mabeli. 'Me u na le moshanyana mona, ea hlooho e mangetse. Ke mothoana ea ratehang. Empa Ke batla u mo nyollele thabeng mane, u mo etse sehlabelo, ka eèna Ke tla u etsa lichaba tse ngata." Ho ka ba joalo joang? Ea ka Molimo o itharile ka botlalo. "Ke tla nka Isaaka, ka Isaaka, Ke tla hlohonolofatsa lefatše lohle le sechaba sohle, ka eèna; empa Ke u batla, u mo nkile, ho mo nyollela mono ho mo hlaba. Ka peō ea Isaaka . . ." Alleluia! "Ka peō ea Isaaka Ke tla hlohonolofatsa sechaba ka seng tlas'a Maholimō, haele uena Ke batla u mo nyollele mono u mo bolaee."

¹⁶⁵ Oh, ntate ea thata eo, ea koenneng, oa leqheku; a jere patsi le mokotla mokokotlong oa hae, a hula esele. Khele! Isaaka e monyenyanne a shebile ka pele ho eèna! "Ha a ka a sisinyeha pallong ea Molimo, ka ho se lumele." O ne a tlamehile joalo!

¹⁶⁶ Hoba Abrahama o itse, ka ho eèna, "Ke mo fumane e se e le ea icholetseng, 'me ke khotsue ruri hoba Molimo o ka boela oa mo tsosa." Amen! Abrahama o ne a loketse joalo, ho phetha ho loketseng hohle. O tsebile seo a buang ka sona. A tseba Molimo oa hae. A tseba hoba, seo Molimo a se buileng, Molimo o se khona ruri. Tsepiso eo Molimo o entseng, Molimo o khona ho boloka tsepiso ea Oona, ho sa tsotelehe. Ka hona, Abrahama a loketse ho phetha ho loketseng hohle.

¹⁶⁷ Barutuoa ba ne ba loketse, mane Pentekosta, ho nyolohela phaposing e kaholimo eo. Hobaneng? Hore'ng ho ne ho loketse joalo? Hobane ba ne ba kopane le Monna; 'Metli, ea tsebjoang ke lefatše, Moeti oa mo-Galelea ea bitsolloang ho thoe, "bonyatsi." Empa ba bone Monna eo a tsosa bafu. Ba bone Monna eo a tutubolla a fofetseng. Ba utloile Monna eo a rera Lentsoe la Molimo, le sa silafatsoang. 'Me ba tsebile hoba E ne e le Messia. Ba bone lipontšo tshole tse Mo teetseng hare. Ba utloile Molimo a arabela ho tsoa Maholimōng. Ba bone Topallo eo ea Mollo e oka-oka holim'a Hae. Ba tsebile hoba E ne e le Messia. 'Me mohlang oo O ba boleletse, "Ho ka ba molemo ho lōna ha Ke tsamaea;

empa Ke batla le nyolohele motseng oa Jerusalema, le lule holimo mono. Emang mono feela.”

“Nako e kae?”

“Ho fihlela!”

“E tla ba nako e kae eo, Morena?”

¹⁶⁸ “Ho fihlela feela! Le tle le be le tlatsoe ka Matla a tsoang Holimo! Le tla ba lipaki tsa Ka ke hona.”

“E tla tsoella nako e kae, Morena?”

¹⁶⁹ “Ho isa molokong *ona*, le ho isa molokong *oane*, le ho fihla ho bao Morena Molimo oa rōna a tlang ho ba bitsa. Ho fihla Jerusalema, Judea, Samaria, le ho isa lipheletsong tsa lefatše. Empa, pele le tloha, Ke batla ha le ka ema! Ke tla le etsetsa ho itseng.”

¹⁷⁰ Ba ne ba loketse joalo ho kena phaposing e kaholimo, hoba ba ne ba bone Matla a Hae. Ba tsebile hoba O shoele, ho shoa. Ho shoa hoo khoeli le linaleli li Mo pakileng a shoele, tsa ikhurumetsa sefahleho ‘me tsa hana ho chaba. Lefatše le Mo tsebile a shoele, la ba la khahloloa ke khatello ea methapo. Mafika a khotometseha mobung, athe esale a tiile ho tloha pele ho tšenyeho. Ba tsebile hoba Eo e ne e le Messia. Ba tsebile seo, Lentsoe la Hae le boletse, hoba O tla boela a romela Moea o Halalelang. Ba tsebile hore eo e ne e le tsepiso. Ba tsebile hoba ba tlameha ho O emela holimo mono. Ba ne ba ’Mone. Ba Mo tsebile a shoele; ba tsebile hoba O tsohile. Ba ’Mone, ka baka leo ba tsebile seo ba neng ba bua ka sona.

¹⁷¹ Ho fihlela monna a tseba seo a buang ka sona, ha a bue hakaalo. Empa ha u tseba seo u buang ka sona! Haeba u hopola sena e le thabo e khaphatsehang, tloo u E fumane hang, u tla tseba seo u buang ka sona. Ha se ho roaleha. Ke Matla a Molimo a isang polokong. Ke Moea o Halalelang. Ke tseba seo ke buang ka sona. E mong le e mong, ea Mo amohetseng, ba tseba seo ba buang ka sona.

¹⁷² Barutuo ba ne ba loketse joalo, ba ne ba tlamehile ho boloka Lentsoe la Hae, ho ema holimo koana Jerusalema. Eaba ba nyoloha ho ema mane Pentekosta, ho fihlela ba amohela Moea o Halalelang. Hoba, ba tsebile bosebeletsi ba bona bo ke ke ba ntšeletsoa ho fihlela ba amohetse Moea o Halalelang, ho paka ka Eèna. Ba itsebile ba se na thuso. Empa ba ne ba tlameha ho fumana Boteng ba Hae, eaba ba tloha ke hona ho ea Bo emela.

Petrose o ne a tlamehile joalo, hoba Jesu a kopane le eèna.

¹⁷³ Ho Mareka 16, ho itsoe, “E-eang ka lefatše lohle, le bolele Evangeli. Mehlolo e tla tsamaea le ba lumelang ke eona ena. Ba tla leleka batemona ka Lebitso la Ka, ba bue lipuo tse ncha, ba tšoare linōha; ba noe lintho tse bolaeang, li ke ke tsa ba etsa hampe; ha ba beha bakuli matsoho, ba tla fola.”

¹⁷⁴ Santa Petrose o ne a loketse joalo, ralihlapi oa khale, thuto ea hae e sa lekana ho ngola lebitso la hae. Empa tsatsi le leng ha a feta khorong e ntle e hahiloeng ke Solomone, monna ea shoeleng litho a robetse mono. Mangole a hae a tserema, maqaqailane, a sa khone ho tsamaea. Esale a le joalo. A se na matla. Monna oa lilemo tse batlileng ho ba mashome a mane, 'me a se na matla. Empa eareha Petrose a utloa lerata la sejana, a shalima a bona monna oa seritsa a robetse mono, eaba Ntho e tobolaka pelōng ea hae! O ne a tsoa Pentekosta, a amohetse Moea o Halalelang! A fuoe pallo ea Jesu, ka hona ea eba tšoanelo, ea eba tšoanelo ho eèna, ha a itse, "Ha ke na silifera le gauta." Eaba o a paka, "Ha ke na silifera le gauta. Empa, seo ke nang le sona, ke u nea sona ha u ka se amohela."

Kea kholoa monna eo o itse, "Nka se amohela."

¹⁷⁵ Ho re, "Ka hona, ka Lebitso la Jesu Kreste oa Nazaretha, ema ka maoto a hao u foie." Eaba o inama a mo nanabela, ho hlakisa tumelo ea hae, a mo phahamisa joalo; eaba masapo a leqaqailane la hae a natlafala, a tloha, a tlolaka, a rorisa a tlotlisa Molimo.

¹⁷⁶ O ne a loketse ho etsa joalo, o ne a tlamehile joalo. O tšoanetse a be a entse joalo, hobane e ne e le morutuoa ea tlotsitsoeng. A kile a lula le Jesu. Lefatše lohle le tsebile, letsatsi pele ho moo, Lekhotleng la Sanhedrine, mohla ba ba huletseng teng, eèna le Johanne, ba babeli, ba sa bala 'me ba sa ruteha; ba tsebile hobane ba tsamaile le Jesu, hoba ba utloile mokhoa oa puo ea bona, sebete sa bona. Ba tsebile hoba ntho e etsahetse ho bona. 'Me Petrose o e tsebile. Ka hona Petrose o ne a loketse joalo, o ne a loketse hobane o ne a tšoere tšepiso ea Molimo ea letsatsi leo.

¹⁷⁷ "Ke tla le fa Matla. Ke tla le fa Matla. Le tla hatikela lihlooho tsa linõha le liphepheng. Seo le se kopang ka Lebitso la Ka, Ke tla se etsa. Ha le ka re ho thaba ena, 'fothoha,' 'me u sa belaele pelōng ea hao, u mpa u lumela seo u se boletseng se tla etsoa, u ka fumana seo u se kopileng."

¹⁷⁸ Petrose o ne a tšoanetse ho E lumela ke hona. O loketse joalo. Ke seo a tlamehang ho se etsa, ka ha a tsebile a phela letsatsing la thomo eo. Leo e ne e le Leseli la hora. Tsoho e ne e sa tsoa etsahala, Moea o Halalelang o le teng mono. O ne a loketse hona.

¹⁷⁹ Santa Pauluse o ne a loketse hona; ka mora ho ipeha mosehõlli. 'Me tseleng ea hae e theohelang Damaseka, tsatsi le leng mono, eona Topallo ea Mollo e tsamaisitseng Israele ho tloha Egepeta ho kena lefatšeng la pallo, e neng e entsoe nama 'me ea aha har'a bona le ho khutlela ho Molimo, e buile le eèna. 'Me o ipotsitse, "Enoa e ka ba Jehova joang? Ho ka ba joalo joang?" 'Me ke Eo, ka Topallo eona eo ea Mollo, e lopletseng mono." "Morena, U mang eo ke mo hlorisang?"

¹⁸⁰ A re, "Ke Jesu." Oh, banna! O ile a mo roma, oa mo nea tšebeletso ea hae. O a ile a roma Pauluse, oa mo nea tšebeletso ea hae.

¹⁸¹ Pauluse a kile a kena ka pel'a Sefahleho sa Molimo, o bone Topallo ea Mollo. A bona hoba ke Jesu eo e kileng ea eba Topallo ea Mollo, a ntano etsoa nama a aha har'a rōna, le ho khutlela ho Topallo ea Mollo, oa mo roma ka thomo ea hae. Alleluia! Ha ho letho le ka mo sisinyang. O ne a loketse ke hona, mohla ba nkang diduku tse amileng 'mele oa hae ba li romella bakuli. O ne a loketse hona, hobane o itsebile e le moapostola ea tlotsitsoeng. Ea boneng lipono tsa Molimo, 'me Molimo oa ipontša eèna oa bua, a ntoo e bona e etsahala hantle. Hobaneng, Pauluse o ne a loketse joalo, mohla a lekang ho thusa batho, ho phethisa Lentsoe leo a le laetsoeng. E ne e le Leseli la letsatsi. E ne e le Leseli ho ba-Lichaba. O e tsebile. Molimo o mo romile ho ba eèna. E ne e le Leseli letsatsing leo. Ka hona, O ne a laetsoe teng, ho Pauluse.

¹⁸² Joale le rōna re loketse joalo, re loketse joalo letsatsing lena. Rea tseba! Re sa tsoa haola le Mengoaha ea Kereke. Rea tseba re amohetse Moea o Halalelang, re e tseba ntle le seriti sa pelaelo. Rea tseba re tšoere Leseli la Evangel.

¹⁸³ "Bakang, e mong le e mong oa lōna, le kolobetsoe ka Lebitso la Jesu Kreste, tšoareleng ea libe tsa lōna, le tla amohela neo ea Moea o Halalelang." Ha ho molisa lefatšeng, kapa letho lesele, le ka latolang Seo. E tlameha ho etsoa ho fihlela kae? "Pallo e etselitsoe lōna le bana ba lōna, le ba leng hole kaofela, bao Morena Molimo oa rōna a tlang ho ba bitsa."

¹⁸⁴ Moporofeta o boletse, "Leseli le tla chaba nakong ea mantsiboea, Maseli ana a Evangel a tla boela a khutlisoa." Joaleka letsatsi ha le chaba Bochabela le likela Bophirimela, Le tla khutla hape matsatsing a qetello. Ke rōna bana re matsatsing a qetello!

¹⁸⁵ Re amohetse Moea o Halalelang. Re tseba seo. Re buile ka lipuo joaloka bona Pentekosta. 'Me rea tseba hore le ka O amohela.

¹⁸⁶ Rea tseba lengeloi la bosupa le ntšitse Molaetsa. Re O bona o nètefalitsoe, pontšo.

¹⁸⁷ Rea tseba hobane re pheletsong ea Mongoaha oa Laodisea. Rea tseba hobane khohlano ea lichaba, mehlolo le meeka, li hlaha hohle. Rea tseba re nakong ea qetello.

¹⁸⁸ Molimo o a paka! 'Me re loketse joalo, re tlamehile joalo ho phetha ho loketseng hohle. "Lichaba li khahlano le lichaba, nako ea tsieleho, khohlano," lintho tsena tsohle tseo re li utloileng. Holane le ka E amohela!

¹⁸⁹ Joale re horen ea ho qetela. Re Mongoaheng oa Kereke ea Laodisea. Moromuo a mong le e mong o neile mongoaha oa hae, o neile mongoaha oa hae Molaetsa oa hae. 'Me re mona qetellong ea mongoaha, 'me re bona Molimo a e nètefalitse ka mehlolo le meeka. 'Me ha ho motho ea ka e tlalehang e se joalo.

¹⁹⁰ O teng mona hona joale! O ka har'a Kereke! O ka har'a batho. Ha ho motho ea ka e tlalehang e se joalo. Rea tseba O teng mona.

¹⁹¹ 'Me re tlamehile ho nka Lentsoe la Hae. Rōna, re tlamehile ho lumela ho loketseng hohle. Re tlamehile joalo. Re loketse ho pheta ho hohle hoo A ho boletseng.

¹⁹² Kereke e a fokola, likereke kajeno. Re pshatlehile ho latela likhang tsa mokhatlo, karohano ea boëna; Methodise, Baptise, Presbeteriene, Oneness, Threeness, Fiveness, ntho ea mefuta eohle. Re pshatlehile. E tšoanetse joalo. E loketse ho ba joalo.

¹⁹³ Ho ntano fihla Molaetsa! Oh, Alleluia! Re e tseba e le eona Topallo ea Mollo e tsamaisitseng Iseraele. Rea tseba hore eona tšebetso e tsamaileng le Jesu Kreste, ka eona Topallo ea Mollo e neng e Mo tlotsitse, e tsamaea le Kereke kajeno. Mahlale a e kholisitse; ha re hloke ntho eo. Molimo o e kholisitse! Re hloka tšebetso ea Jesu Kreste e nyallanang le Lejoehloro leo le tlang koana, eona e fihlisitseng Kereke hantle tšebeatsong e tšoanang le ea mohla Jesu a neng a tloha. Ka népo!

Lichaba lia pshatleha, Iseraele e a tsoha,
 Lipontšo tseo bahale ba li boletsoeng;
 Matsatsi a ba-Lichaba a baliloe, ka likoluoa tse
 phophothang;
 "Khuttlelang, oho ba hasaneng, ha'bo lōna."

¹⁹⁴ Re matsatsing a qetelo. 'Me re loketse joalo, ke tlameho ea rōna ho pheta ho loketseng hohle.

¹⁹⁵ Hopolang, Jesu o boletse, "Joaloka matsatsing a Lota, ho tla ba joalo ho Tleng ha Mora motho." Ba e hopolang ba bakae? [Phutheho e re, "Amen."—Mohl.] Ke hantle. Ho etsahetse'ng matsatsing a Lota? O hlasisitse pontšo efe?

¹⁹⁶ Lihlopha tsa batho li ne li le tharō matsatsing a Lota. Na ho ne ho le joalo? [Phutheho e re, "Amen."—Mohl.] Mosalumele e le eo, moipehi-tumelo, le molumeli. E mong le e mong oa bona o fuoe moromuo. Ke hantle. Mohla Abrahama a lutseng tlas'a eike ea hae, ho etsahetse'ng? Le shebe se hlabileng.

¹⁹⁷ Lengeloi le theohile la theohela Sodoma. Monna enoa a kena mono a ba ruta pakō, hore ba bake ba sokolohele ho Molimo. Ho etsahetse'ng? Ho tsoile ba bararō feela, Lota le barali ba babeli ba hae. Mohats'ae a fetoha tšiea ea letsoai. Ho tsoile ba bararō feela, mohla Billy Graham oa mehla ena a neng a ba phatlola ka molaetsa ka mono.

¹⁹⁸ 'Me re bona hoo ho etsahala kajeno. Rea bona, nqa kereke ea maipolelo a molomo feela, re bona moromuo ea tsoang, a ntse a rera.

¹⁹⁹ 'Me e Mong o tlie ho Abrahama le Kereke e khethiloeng. O ba nea pontšo. 'Me rea tseba ke 'nete. Re e tseba e le ntlha. A lula a furaletse tente ka mokokotlo oa Hae, a bolela hore Sara e ne e le mang, se pelōng ea hae, hore bothata ba hae e ne e le

bofe. A hlahisa molaetsa, hantle feela. Abrahama o tsebile hoba eo ke Molimo. Hoba, hang hoba A rialo, o Mo bitsitse, "Elohim," Moromuo, ea bopiloeng ka nama ea motho, ho tlisetsa Sodoma le Gomora Molaetsa.

²⁰⁰ 'Me ha re bona lintho tseo Jesu a li boletseng li tla hlahia, re loketse ho pheta ho loketseng hohle. Re loketse ho nka Molimo Lentsoeng la Oona. Na le lumela seo? [Phutheho e re, "Amen."—Mohl.] Lumella ho be joalo hona joale.

²⁰¹ "Moena Branham, u a—u a—uenia u mokhelo ho bona kaofela, mekhatlo ea malumeli."

²⁰² Ho ka ba joalo. Lumellang ho be joalo joale. Ke hantle, le e lumelle joalo.

²⁰³ "Be, u ka iketsetsa molemo holane oa tsoelapele ua sebetsa 'moho."

²⁰⁴ Le lumelle hoo hona joale, hoo. Empa re loketse joalo. Re batho ba Hae, baporofeta ba Hae, bahale ba Hae. Re loketse ho pheta ho loketseng hohle. Ka hona, ha re etseng joalo, re sa inamisa lihlooho tsa rōna.

Lichaba lia pshatleha, Iseraele e a tsoha,
Lipontšo tseo Bibebe e li boletseng;
Matsatsi a ba-Lichaba a baliloe, ka likoluo a tse
phophothang;
"Khutlelang, oho lōna ba hasaneng, ha'bo
lōna."

Letsatsi la topollo le haufi,
Pelō tsa banna li qhibilisoa ke tšabo;
Tlang Moea, mabone a lōna a kutoe a hlake,
Lelalang, topollo ea lōna e haufi!

Baporofeta ba bohata ba thetsa, 'Nete ea
Molimo ba e latola,
Hore Jesu e leng Kreste ke Molimo oa rōna, (Ke
'nete e kakang eo; oh, makholo!)
Empa re tla hata moo baporofeta ba hatileng.

Hoba letsatsi la topollo le haufi,
Pelō tsa banna li qhibilisoa ke tšabo;
Tlalang Moea, mabone a lōna a kutoe a hlake,
Lelalang, topollo ea lōna e haufi!

²⁰⁵ Ha le sa inamisitse lihlooho tsa rōna, u loketse joalo, hoseng hona, ho nea Kreste bophelo ba hao? Na O buile le uena? Haeba ho le joalo, phahamisetsa letsoho la hao ho Eèna feela, le ho re, "Joale ke amohela Kreste. Ke loketse ho inehela tsohle, thato ea ka, hoseng hona, ho Eèna. Joale ke phahamisa letsoho la ka ke re, 'Morena Jesu, nkhaihuele.' Kea U hloka, oh, ke U hloka joang! Hora ka 'ngoe, ke U hloka ka hora." Molimo a le hlohonolofatse. "Oh, 'Moloki ea Bokoang, ke tla ho Uena."

Kea U hloka, oh, kea U hloka;

Ho ka thoeng holane u robetse moo 'mè a robetseng hona joale?

Ke U hloka hora le hora!
Oh, ntšitse, joale 'Moloki,
Ke tla ho Uena!

Kea U hloka, oh, Oho Morena, rea U hloka;
Ke U hloka hora le hora!
Oh, ntšitse joale,

Morena, ke u hloka joale ho feta khale nakong efe e fetileng.
Empa ke tla ho Uena!

²⁰⁶ [Moena Branham o qala a binela, *Ka Metsotso Eohle* ka marameng—Mohl.]

²⁰⁷ Ntate oa Leholimo, re tsamaea tlase liphuleng, rea tseba hobane U tsepisitse, “Nke ke ka le tlohela, Nke ke ka le lahla. Le batle 'Muso oa Molimo pele, le ho loka ha Hae, tse ling tsohle le tla li ekeletsoa.”

Ka hona Ke tla ho Uena!

²⁰⁸ Haeba ba le teng mona, Morena, ba sa lokang moeeng oa bona; hola ba ka theoha ka tselana eo, eona eo 'mè a keneng ho eona motsotsong ona hantle, oho Morena, ba ke ba tšoare bopaki boo, le bona. Re loketse kajeno, Morena.

²⁰⁹ Re qetellong ea tsela, Mongoaha oa Kereke ea Laodisea; Molaetsa; ho latola Molaetsa; nètefatsa ea Molaetsa; 'me Boteng ba Kreste bo kholisa hobane O a tšoana, maobane matsatsing a Lota, le matsatsing a nama ea Hae, le matsatsing a kajeno; maobane, kajeno, le ka mehla.

²¹⁰ Ba ke ba U amohele joaloka 'Moloki oa bona ea bokoang. Aba sena, Morena. Ke kopa ka Lebitso la Jesu.

Oh, ntšitse, joale 'Moloki,
Ke tla ho Uena!

Morena ea bokoang,
Meleko e fela matla,
Ruri, Morena, ha U fihla.

Kea U hloka, oh, kea U hloka!

²¹¹ Haeba U mo nkile Morena, phomotsa moea oa hae o theko e thata Leholimöng. Aba sena, Morena.

'Moloki oa ka, ke tla ho Uena!

²¹² Ntate, Molimo, re utloe. Re loketse ho pheta ho loketseng hohle mona. Re tseba seo Lentsoe le se buang. Ha re lefifing. Re tseba seo Lentsoe le re baletseng sona. Re thuse, oho Morena, ho phetha ho loketseng hohle. Phethahatsa Lentsoe la Hao. Molumeli e mong le e mong mona a be le tumelo joale, re sa tlela bakuli. Kaofela ha rōna re rata ho phela, Morena; empa pele ke ho fumana Bophelo Bosafeleng, bakeng sa lefatše leo le tlang ho

tlə. Re utloe, Ntate, nakong eo phutheho e ntseng e rapela, haholo bakuli le ba mahlomoleng.

²¹³ Kea ipotsa, mang feela, haeba moeti a le teng har'a rōna, ba eso kene tabernakeleng ena pele, 'me u a kula, 'me u batla thuso ea Molimo? Ka lihlooho tsa lōna tse inamisitsoeng, kaofela ha lōna. Na u ka phahamisa letsoho la hao, lōna batho bao ke sa ba tsebeng, ba sa ntsebeng kapa bao 'na ke sa ba tsebeng, 'me u tlie ho Kreste joale ho thusoa. Phahamisa letsoho la hao feela. Ua bona? Molimo a u hlohonolofatse, uena, le uena. Ba teng ba 'maloa.

²¹⁴ U tlameha ho lumela feela. Molaetsa 'ona ha se lefeela, ke Lentsoe la Molimo.

²¹⁵ Ho bona leleiti . . . Ka lihlooho lōna tse inamisitsoeng. U lutse a phahamisitse letsoho la hae. O jeoa ke lefu la pelō. Ke Mof. Nance. O tsoa Madisonville, Kentucky. Ke hantle. Na ha se eona, leleiti? U ka phahamisa hlooho ea hao ha u batla. Esale u phahamisitse letsoho la hao, 'me ua lula u le phahamisitse. Ke 'nete, na e ne e se eona? Haeba e le eona, phahamisa letsoho la hao. Na le bona moo re phelang teng, metsoalle? [Phutheho e re, "E."—Mohl.] Ha ke tsebe leleiti leo. Ha ke e-so 'mone le ka mohla. Empa ke'ng? Ke pontšo ea Evangel. Hore le tle le khone . . .

²¹⁶ Ua lumela hobane ke moporofeta oa Hae, uena leleiti? U etsa joalo? Koana, ha re tsebane. Ha ke u tsebe. Lebitso leo e ne e lona, na e ne e se lona? Haeba e ne e lokile ka hohle, sohle seo A u boleletseng sona, feela—feela tsokoletsa letšoele matsoho a hao, ba ka bona hobane e ne e lokile. [Phutheho e a nyakalla—Mohl.]

²¹⁷ Ke hofe ho beng ho ka etsa joalo? Jesu oa Nazaretha. Hore le tle le tsebe hobane ke moporofeta oa Molimo, 'me ke le bolella 'Nete, hobane re loketse joalo. Mosali o amile seaparo sa Hae, eaba O retoloha a 'molella, "phallo ea mali" a hae, 'me ha thoe e khaolitse.

²¹⁸ Leleiti le lutseng pel'a hao, le jeoa ke lefu la pelō, le lōna. Ke hantle. Yaa. Ha ke mo tsebe. U a ntseba ha ke khone, 'mè. Empa Molimo o a mo tseba. O tseba bothata ba hae, na ha A khone? Mof. Allen, u a lumela Molimo a ka u phelisa? [Mosali eo o re, "E."—Mohl.] Haeba e le lebitso la hao leo le bothata ba hao, phahamisa letsoho la hao. Phahamisa letsoho la hao, haeba e le 'nete. [Phutheho e a nyakalla.]

²¹⁹ Leleiti le lutseng pel'a hao mono. Ke bolela Mof. Bennett. Bohle le tsoa tulong se le seng. O ne a jeoa ke phieo sebakeng sa lefu la pelō. Na u lumela ka pelō eohle ea hao, u ka phekoloa, le uena. Na u etsa joalo, uena leleiti? Phahamisa letsoso la hao, le ho re, "Ke tla e amohela," ke moo u ka eang hae ua phelisoa. Ha u ka lumela! Bohle le tlase koana Kentucky, motseng o bitsoang Madisonville.

²²⁰ Morao mono ho lutse, leleiti, Mof. Bone. O haufi le Madisonville. Ha a lule hantle Madisonville, o nchebile hantle.

'Me Lengeloi leo ke leo le eme holim'a hae hantle. O phela haufi le Madisonville. Lebitso la hae ke Bone; bothata ke disaenase, maemo a asma, ho khohlela. Haeba ho le joalo, tsokoletsa letsoho la hao morao le pele, leleiti. Lumela ho Morena Jesu Kreste, 'me u ee hae 'me u phela.

²²¹ Bothata ba 'metso, monghali. U lumela Molimo a ka folisa bothata ba 'metso le ho u phelisa? Fola ke hona! Eba le tumelo ho Molimo feela.

²²² Mfn. Hopkins, leleti la motho oa 'mala le tsoang Chicago. Ha ke u tsebe, ha ke eso u bone bophelong ba ka le ka mohla. Empa u batla ho folisoa dinerefe tseo, bothata ba disaenase? E- ea, lumela, 'me u ka phelisoa, le uena.

²²³ Mof. Hanes ho tsoa Columbus, Ohio. U lumela ho Morena Jesu Kreste, u ka ea hae 'me ua phelisoa, le uena.

²²⁴ Re qetellong ea tsela. Na le lumela seo? [Phutheho e re, "Amen!"—Mohl.] Re loketse ho pheta ho loketseng hohle. O tsepisitse lintho tseo joalo. Re mona. Lea e lumela na? ["Amen!"]

²²⁵ Be, beanang matsoho holimo. Ke batla ho le botsa potso. Na Jesu o tsepisitse lintho tsee ho hlaha matsatsing a qetello? E reng, "Amen." [Phutheho e re, "Amen."—Mohl.] "Joaloka matsatsing a Lota. Mesebetsi eo Ke e etsang, le lōna, le tla e etsa." Na ebe O boetse o boletse sena, "Mehlolo e tla tsamaea le ba lumelang ke eona ena. Ha ba beha bakuli matsoho a bona, ba tla fola"? ["Amen."] Na u itokiselitse ho ho nka kemo ea hao, uena molumeli? ["Amen."] Hobane e ka khona re phethe ho loketseng hohle.

²²⁶ Ke ho loka ha Molimo, hore e tle re ha disakatuku tsena mona (ke li beha matsoho, ka Lebitso la Jesu) ha li le ama; kea tseba Moea o Halalelang o teng mona, Ea neng a le 'moho le Pauluse. "Ba nkile ho Pauluse . . ." Le tla folisoa ke hona, ha le ka e lumela feela.

²²⁷ Ke lumela ho Moea o Halalelang o tšoanang, ka Moea o Halalelang, o teng mona hoseng hona, ho Ikholisa, Molaetsa oa letsatsi la morao; Moea o Halalelang o moholo ka Seqo, o Ipontšang, o kenang nameng ea motho, o etsang mesebetsi ea Hae.

²²⁸ Ke ile ka ema hoseng hona, tlas'a maima. Le batla le tseba seo ke leng mothating oa ho se utloa ha ke tloha mona. Empa re loketse joalo hore ho loka hohle ho phethoe.

²²⁹ Molimo o behile Molaetsa pelōng ea ka. U loketse joalo, joaloka molumeli, hore u lumele. E re, le sa behane matsoho holimo, ho ke ke ha fumanoa mokuli har'a rōna, hola feela le ka lumela ka pelō eohle ea lōna, itokiseng ho nka kemo ea lōna.

²³⁰ Joale, Ntate oa Leholidō, re U hlahisetsa letšoelie lena, ka mora Molaetsa ona. Morena Molimo, ruri batho ba ka bona joale hore re loketse joalo. Moporofeta o loketse joalo, ho ema

Lentsoeng. Setho sa kereke se loketse joalo, ba loketse ho ema. Batho ba kulang ba loketse joalo, ho lumela Lentsoe la Jesu Kreste, mohla A itseng, "Mehlolo e tla tsamaea le ba lumelang ke eona ena. Ha ba beha bakuli matsoho, ba tla fola."

²³¹ Ke ne ke batlide ho rala mola oo oa thapelo, Morena. Empa molaetsa o sa tsoa mphihlela, ka mohala, o nkohohlopile, Ntate. Oho Molimo, Lentsoe la Hao le re, "Re loketse ho phetha ho loketseng hohle." Ke bana moo ba leng teng, e mong le e mong.

²³² Moea o Halalelang o teng mona o Ikholisa har'a rōna. Joale Matla a Molimo, bopaki ba Moea o Halalelang, bo kene lipelōng tsa batho bana hona joale, ho ba kholisa; joaloka Daniele, joaloka Nohe, joaloka Henoke, joaloka Johanne, joaloka Petrose, joaloka Pauluse, joaloka Jesu, joaloka Abrahama, joaloka bao bohle, Morena. Hore, re loketse joalo mongoaheng ona, moo matla a pholiso ea Khalalelo a tšolloang, ho etsoa mehlolo le meeka, letsoso le leholo le kena har'a batho, Moea o Halalelang o theohetse har'a batho. Ba hooeletitse, ba buile ka lipuo, ho porofeta, lineo tse khōlō, le mehlolo le meeka. Lengeloi la Molaetsa, Lengeloi la mongoaha le ipontšitse rōna ka sebopinho sa Moea o Halalelang, 'me Le re tlisetsa Molaetsa. Re O bona o phethahatsoa. Re 'Mona a nka mebele ea rōna a re fetola ho tsoa bathong ba busoang ke ho shoa, ho fetola babuelli ba Molimo, ho bolela mehlolo le meeka e meholo e mohlolo. Ha re bona lintho tsena, re loketse joalo ho phetha ho loketseng hohle.

²³³ Athre tseba Abrahama a ile a hetla Lota, Daniele o ne a ka hetla ho Abrahama, Johanne a ka hetla Daniele, (oho Molimo!) Petrose le Johanne ba ka sheba ho Jesu. 'Me rōna re ka ba sheba, 'me kajeno re bona litholoana tse tšoanang har'a rōna, re loketse ho phetha ho lokelang hohle.

²³⁴ Matla a Jesu Kreste a phalle mohahong ona, ka tumelo e Mokhethoa, le ho folisa motho e mong le e mong ka mona, maloetse le mafu a mang le a mang, Morena. 'Me, joaloka mohlanka oa Hao, ke laela diabolosi enoa ea nkhatetsetseng hoseng hona hohle, ea lekileng ho ntlosa sefaleng sena! Ka mohau oa Molimo, ke ile ka lula mona, molemong oa batho bana ba busoang ke lefu, ba kulang kapa—kapa ba sotlehang ba Molimo.

²³⁵ Tsoa ho bona, Satane, uena diabolosi! Kea u laela, ka Jesu Kreste Molimo o phelang, ho tsoa bathong bana, le ho se hlole u ba tšoenya, hoba ba eme joaloka ka bana ba Baheberu horenq ea teko, ho nka kemo ea bona, le ho folisoa ho qala horenq ena ho tsoelapele. Ka Lebitso la Jesu Kreste, ke laela maloetse le bodiabolosi ba phutheho ena, ba tileng ho kulisa batho bana, ho tsoa ho bona!

²³⁶ Ka lihlooho tsa rōna tse inamisitsoeng, ka lipelō tsa rōna ho Molimo, ke tlil'o bina sefela. Ke tla se leka, ka thuso ea lōna le ka thuso ea Molimo. *Tumelo Ea Ka E Lelala Ho Uena*. Ha ke

battle ha u ka belaela, le hanyenyane, empa ke batla u lumele joale. Re loketse joalo. Bakreste ba bakae ka mona? Phahamisang matsoho a lōna, le re, "Amen." [Phutheho e re, "Amen!"—Mohl.] Balumeli ba bakae? E reng, "Amen." ["Amen!"] Ba behileng ba bang matsoho ba bakae? E reng, "Amen." ["Amen!"] Ka hona re loketse ho phetha ho loketseng hohle.

Tumelo ea ka e lelala ho Uena,
 Uena Konyana ea Kalvari,
 'Moloki ea khetheleng;
 Nkutloe joale ha ke rapela,
 Tlosa bokhopo bohole ba ka . . . (Joale, *sebe* ke
 "ho se lumele")
 Oho ho tloha kajeno
 Ke be oa Hao ka botlalo!
 Ha ke tsamaea tseleng e chehiloeng lifi,
 Le mapalesapelo a nteela hare, (Molimo, eba
 Lesupatsela la ka joale!)
 Eba Lesupatsela la ka;
 Laela lefifi e be letše share,
 Phumula likeleli tsa masoabi,
 Ke se suthe Ka tloha pel'a Hao.

²³⁷ Ka lihlooho tsa rōna tse inamisitsoeng. 'Mè ea ratehang eo oa ka o se a iketse ho tloha ke qalile ho rera, molomo oa kolu ea ka o ke o khabole likhohlong tse khōlō tsa Leholimō.

²³⁸ O mpoleletse, tsatsi le leng, o itse, "Billy, u mphepile. Ua ntefella rente le molato oa motlakase, ua 'nea ka ja." Ho re, "Moratuoa, e ne re u sa le moshanyana, ke tsoele kantle ho ratha patsi, ho u besetsa mollo ho ikomosa. 'Me ka u phehela, seo re neng re se tšoere ka tlung, ho se pheha." Ho 'mona a robetse mono, 'me matsohoana a tetemang ao a khale a hlatsoitse liaparo tsa rōna tse litšila. U ema u sa thuse letho, ha kea khona ho etsa letho.

²³⁹ Ka re, "Mama, ke nehela matsohong a Molimo o phelang, ke laeletsa moea oa hao."

²⁴⁰ Haeba a se a iketse ho tloha lekhatheng leo; ba tsamaile kaofela, ho setse baena ba ka bohole. Molaetsa mona sefaleng o ne o le mobe. Haeba a iketse, Molimo a phomotse moea oa hae. Haeba a sa le 'moho le rōna, le ho ba 'moho le rōna ho fihlela bosius bona, ka mohau oa Molimo ke tla fihla mona sefaleng ho khatha tema ea ka, hobane ke loketse ho phetha ho loketseng hohle.

²⁴¹ Ha ke ntse ke batlisisa, ke fetisetsa tšebeletso ho Moena Neville, molisa e leng motlatsi oa ka ea bokoang.



RE LOKETSE HO PHETA HO LOKELANG HOHLE SST61-1001M
(It Becometh Us To Fulfil All Righteousness)

Molaetsa wona, ka Moena William Marrion Branham, o rerilwe sethatong ka Senyesemane a Sontaha hoseng, Mphalane 1, 1961, mane Branham Tabernacle, Jeffersonville, U.S.A., o ntshitswe kgatisong ya teipi ya makenete mme o ngotswe o sa kgaolwa ka Senyesemane. Petolelo ena ya Sesotho sa Borwa e ngotswe mme e abjwa ke ba Voice Of God Recordings.

SOUTH SOTHO

©2017 VGR, ALL RIGHTS RESERVED

VOICE OF GOD RECORDINGS, SOUTH AFRICA OFFICE
58 DISA ROAD, ADMIRAL'S PARK, GORDON'S BAY 7140 WESTERN CAPE
REPUBLIC OF SOUTH AFRICA

VOICE OF GOD RECORDINGS
P.O. Box 950, JEFFERSONVILLE, INDIANA 47131 U.S.A.
www.branham.org

Temoso Ea Tokelo Ea Qopitso

Litokelo tsohle li babaletsoe. Buka ena e ka porintoa ka porintara ea lelapa molemong oa motho eo kapa ea abjoa, ntle ho tefiso, e le thepa e jalang Evangeli ea Jesu Kreste. Buka ena e ke ke ea rekisoa, ea boela ea hilahisoa ka bongata, ea manehoa leboteng la website, ea bolokoa ka tsela eo e ka boelang ea ntšoa, ea fetoleloa ka lipuo lisele, kapa ea sebelisoa ho qela matlole ntle le tumello e ngotsoeng ea Voice Of God Recordings®.

Ho fuoa boitsebiso bo bong kapa bakeng sa thepa e nngoe e ka fumanoang, ka kopo ikopanye le:

VOICE OF GOD RECORDINGS
P.O. Box 950, JEFFERSONVILLE, INDIANA 47131 U.S.A.
www.branham.org